

## JESUKRISTO VXYAAWA'JA'S KAAJIYU'JNI

<sup>1</sup> Naa txã'wě Dxus kaajiyu'jnisa' Jesukristo's, açã' Jesukristo' txã'sna selpisaatxku kaajiyu'jwa'jsa yu' naa ensu seena' yũuwa'ja's, kxajk Jesukristo' txã'sna selpisáa Juana's kaajiyu'j teeçx angela's kwe'we'jçxa.

<sup>2</sup> Txãa pa'gak Juana' Dxus yuwe isasa's we'we Jesukristo kaavxya'ja'the uyni's jxuka, txãasa ãsxĩinisame'.

<sup>3</sup> Naa pa'ga na'sna leeĩsa' nxusmée weçxana yaakxwa'jsata', açã' Dxus yuwe ayte na'wě fxi'jni' txã'sna leeĩçte wěse'jsawa isasa yuhna sũhna yajkxçxa kxtey yuusa' weçxana yaakxwa'j ji'phta'. Txã'wěme' kĩhwa seena' kxtey yuuwa'j ena' utxaaçã'.

### *Dxus nasa siete ahte pkhaakhesatx weçxani*

<sup>4</sup> Juan yaasesa adxthu fxi'ja' Asia kiwete Dxus luuçx siete ahte pkhaakhesawe'sxtxi weçxana. Dxus yakh ewçxáa mfxi'zewe. Txã' nyafxíiwa txãáiçxáak yu', sa' açxwa txãáiçxá', sa' txãáiçxáa bagaçxtewa nes yuuna. Sa' Dxus tasxte ũssa siete espíritusawe'sx pu'çxnitxwa mpa'gawe.

<sup>5</sup> Sa' txã'wěy Jesukristo pu'çxni'swa mpa'gawe. Txã' Dxus yuwe's jxuka pta'sxsa' txãak uuçxawa ki' ãtxĩ yuu nyafxte, sa' açxha' txãa jxkaajxa' ãjãwa'jsa' naa kiwete jxkaahsawe'sxtxi. Kristo'

kwe'sxtxi's peeygãhçxa kwe'sx pkaltxi's txajx eeju pkhi'kxku.

<sup>6</sup> Txã'wẽ yũuçxak kwe'sxtxi's jxkaahsa vxite' sacerdote vxitçxa nvxiht Dxusa's selpikahn. Sa' Kristo yuuçxáa kĩhtewa jxuka ãjãsa jxtuhthe yuuwa'jsa' bagaçxtewa.

<sup>7</sup> Txã'sa' mthegwe, tãaphte yuja'. Txã'sa' jxukaysa uyuutxna, txã'sna kpã'vxit-sawa. Sa' uyçxa' naa kiwete nasa jxukaysa ũ'netxna. Isath we'we', txã'wẽ yuh yuutxna.

<sup>8</sup> Kwe'sxtxi nwe'wesa' ma'wẽ yũuwa'ja'swa ãjãwa'jsa we'weçxa': Adxa' naa kiwe meetey ũsyã'th yu', sa' bagaçxtewa nes yuuwa'jsath pçuwa'jsamée jĩ'k. Txã' nyafxíiwa txãak yu', sa' ãçxwa txãáiçxá', sa' txãáiçxáa bagaçxtewa nes yuuna.

### *Dxus Nçxi'k nasa yuusáa vxyaani*

<sup>9</sup> Adxa' Juan i'kwe'sx yakthẽ'th. Txãasa i'kwe'sx na'wẽy ja'daçxah pxthaa yuuwa'ja'swa jxpa'gasath, sa' Dxus jxkaahni ena'swa jxpa'gasath i'kwe'sx na'wẽy. Sa' Jesukristo' kĩhtewa wantãywa'ja's ũsku txã'snawa i'kwe'sx na'wẽy jxpa'gasath. Nawa naasáa Dxus yuwe's Jesukristo kaajiyu'kh txã'sna pta'sxpaga yuuçxáa adxa' preesuth ũsu' kiwe Patmos yaasesa yu'pxãhte u'pu'k kxtee.

<sup>10</sup> Sa' teeçx ki'sen ente' Dxus Espiritu aphniith yuu, sa' adx e'ste trompeta's tukani na'wẽ seena' sus we'weni wẽse'th.

<sup>11</sup> Txã' na'jĩ'k:

—Kĩh yuhwa meetey adxa' ũsyã'th yu', sa' bagaçxtewa nes yuuwa'jsath. Aça' idx uyuuçgu

txāatxi's eçte fxi'jçxa mkaah Dxus luuçx si-ete ahte pkhaakhena ũssa Asia kiwetewe'sxtxi, Efxeso, Esmirna, Pérgamo, Tiatira, Sardis, Fx-iladelfxia, Laodicea txāa çxhabetewe'sxtxi jīte',

<sup>12</sup> ¿Kimki'k txā'wē we'we? sūhçxa yu'thegçxa', uythu bela txaahnisa sietetx ũsu' vxyuu behçxaçxáasa.

<sup>13</sup> Sa' txāa bela txaahnisa ksxavxyte Dxus Nçxi'k nasa yuusáa na'wēsak ũsu', ropa çxida vxiçte kīhsa athçxa, jxtudnisawa vxyuu behçxaçxáasa peçxute kāh tapesak ji'phu'.

<sup>14</sup> Sa' dxkhas yu' khas ew çxihme na'wētx yu', meeçxawa yādx na'wē çxihme. Sa' yafx yu' ipx beesa na'wētx yu',

<sup>15</sup> naapkaçxha' txajx çxida yu', çama's ipxte aaçxa'jni na'wētx zhiçxkwe kwentete'. Aça' txajx we'weni yu' yu'wala seena' susni na'wēk pthūuse'.

<sup>16</sup> Txajx kusete yu' siete estrelxatxku ji'phu', naapkaçxha' txajx yuwesu yu' espada pdxi'p seena' zeksak sēhna ũsu'. Aça' txajx dxi'p yu' sek kweethni na'wēk eena' khikhyna ũsu'.

<sup>17</sup> Aça' txā'wē uyçxa', txajx tasxga uuníi na'wēth wete. Nawa txajx kuse paçuwe'sxa's adx kajkwete peekizeçxa na'jī'k:

—Ūukhnu, naa kiwe meetey adxa' ũsyā'th yu', sa' багаçxtewa nes yuuwa'jsath pçuwa'jsamée.

<sup>18</sup> Uuçxawa ki' itxī yuusath. Ūuwa'ja's peena yu' ji'phuya'mée adxthu knay, sa' uu kiwetewa kaafxī'ze'jme'nja, txāasa āçxha' багаçxtewa itxīçxáa nes yuuwa'jsath.

<sup>19</sup> Na'wē idx uygu txāatxi' mfxi'j, āçxh uynisa

ki' e'su vxite uyuune'ga txãatxwa.

<sup>20</sup> Adx paçu kusete siete estrelxatx uygu vxite' bela txaahni sietesatx txã'wësa' na'wë kaajiyu'jsata': Txãa estrelxa' Dxus luuçx siete ahte pkhaakhena üssatx yuwee pta'sxsa angeswe'sxta', naapkaçxha' siete bela txaahnisa' Dxus luuçx siete ahte pkhaakhesawe'sxta' jĩ'k.

## 2

### *Efxeso çxhabetewe'sxtxi pta'sxni*

<sup>1</sup> Dxus luuçx Efxeso çxhabetewe'sxtxi jxpe'jsa Dxus angela's mfxi'j na'jĩna: Paçu kuseju siete estrelxatx atçxa siete bela txaahnisa vxyuu behçxaçxáata' txãa ksxavxysu u'jusa we'weçxa' na'jĩ'k:

<sup>2</sup> Dxus dxi'pte i'kwe'sx ma'wë fxi'zesatewa jxuka jiith. Wala yuh çxhãçxha mjĩina wantãyna fxi'zesa i'kwe, sa' ewmeesa yuutxi'sa' jxpa'ga'çmëe i'kwe. Txã'wë Jesus jxkaahnisatha'w jĩna pa'jsawe'sxtxi'sa' jxpa'gamëe kimtewa ew jiyuya' yuwe paapëyi'i'kwe, sa' txã'wë yũuçxa' Jesus jxkaahnisamëe ãsxĩisatewa jiyu'i'kwe.

<sup>3</sup> Wahtxmëe adxna selpiipa'ga wala pxthaa yuuna wantãyna mjĩiwa'j ji'phu'i'kwe txã'wë yũuni's adxa' jiith.

<sup>4</sup> Nawa i'kwe'sx ähmëe yũuni's we'wewa'j ji'pthu. Nyafxii na'wë i'kwe wala peeygãawa'ja's ji'phu' txãa yu'sa' açxha' ji'phmëe i'kwe.

<sup>5</sup> Txãa pa'ga kĩhtene'kwe jxpuba txãa pkala's nvxihtçxa Dxus tasxte misxawedwe, sa' nyafxii ma'wëne'kwe peeygãasa yu' txã'wëy myũuwe.

Txã'wě yũumeete', tud yuwe'nja i'kwe'sxtxi kastigãyya', sa' i'kwe'sx ksxavxyu bela txaahni's jxũna u'jçxa vxite ahte txaja'nja, pkaltxi nvxihtçxa Dxus tasxte sxawedmeete'.

<sup>6</sup> Txã'wěçxawa na'wě yũuwa'j yu'sa' ew i'kwe yũ'. Nikolaitawe'sx fxi'zeni yu'sa' açe'i'kwe txã'wěsa yu'sa' adxwa açe'th.

<sup>7</sup> Kxtey nwěese'jwa'jsa ũsçxa', mwěese'jwe Dxus Espiritu' na'wěk we'we' Dxus luuçxtxi: Dxus ũsnite fxtũu tasx ũsa' bagaçxte yuhwa peejxmée yũnna nes yuusa txã' uumée kaafxi'ze'jsa'. Txã'sa' puuç'u'nja ewmeesa yu'sa' nwěese'jmée jxuka knaysawe'sxtxi'sa' jĩ'k.

### *Esmirna çxhabetewe'sxtxi pta'sxni*

<sup>8</sup> Dxus luuçx Esmirna çxhabetewe'sxtxi jxpe'jsa Dxus angela's na'jĩna mfxi'j: Naa kiwe meetey ũsyã'kh yu' sa' bagaçxtewa nes yuuwa'jsa uuçxa ki' itxĩ yuuk txã' na'jĩ'k:

<sup>9</sup> Dxus dxi'pte i'kwe'sx ma'wě fxi'zesatewa jxuka jiith. I'kwe'sx pxthaa yuuna kĩhwa ji'phmée fxi'zeni txã'wě yũuni's jiith. (Nawa ew yajxte yu' wala ji'phsa i'kwe.) Sa' Dxus luuçx meeçxawa Dxus luuçxtha'w jĩna weeçx we'wesatxwa jiith. Nawa txã'wě yũusa' eçxthěj nasa yuuçxáata'.

<sup>10</sup> Pxthaa yuuwa'j pa'jana txã'sa' ũukhmeene'kwe. Eçxthěj'ja' i'kwe'sx maaítxi's karcelte txajana, i'kwe'sx jxukaysa ma'wě yũutewa jiyuya'. Aça' diez enpkaçx wala pxthaa yuuwa'j ji'phune'kwe. Nawa Dxus yakh txutemée mfxi'zewe uu entepkaçx, aç'a' adxa' itxĩ fxi'zewa'ja's ũsu'nja txã'wě ew fxi'zepa'ga.

11 Kxtey nwēese'jwa'jsa ūşçxa', mwēese'jwe Dxus Espiritu' na'wēk we'we' Dxus luuçxtxi: Ewmeesa yu'sa' nwēese'jmée jxuka knaysawe'sxa' Dxus yakh багаçxte yuhwa peena yu' puutx uywa'jmeete yu' u'jmeetxna jĩ'k.

*Pérgamo çxhabetwe'sxtxi pta'sxni*

12 Dxus luuçx Pérgamo çxhabetwe'sxtxi jxpe'jsa Dxus angela's na'jĩna mfxi'j: Espada pdxi'p zeksa's ji'phsa' na'jĩ'k:

13 Dxus dxi'pte i'kwe'sx ma'wē fxi'zesatewa jxuka jiith. I'kwe'sxa' eçxthē'j jxkaahna ūsni ksx-avxyte ūşçxawa, adx tasxu yu' txutemée i'kwe fxi'ze'. Adx kaapiya'jni's pta'sxsa Antipas nakwe wala seena' pxthaa i'kwe'sx ksxavxyte ikhni yuuk txāa enteçxāa yuhwa ūukhçxa adx yase's kxsusmée yu' yuumée i'kwe, kxteek eçxthē'j ūsu' nawa.

14 Txā'wētewa i'kwe'sx āhmée yūuni's we'wewa'j ji'pthu: Balaan kaapiya'jni's nwēese'jsawe'sxtxi i'kwe'sxa' iipe'ji'kwe Pérgamo çxhabetwe. Txāa Balaana' Balakha's ewmeek yu'kxpeh Israelwe'sxtxi's kaypuba'khan, txāasak Dxus itxīmeesatx weçxana tajkx ikhni çxiçxa's ū'kaah, sa' pkal kazx yuuna fxi'zewa'ja'swa kaapiya'kh.

15 Sa' Nikolaitawe'sx kaapiya'jni's nwēese'jsawe'sxtxiwa iipe'ji'kwe. Txā'wēsa yuutxi's adxa' açe'th.

16 Txāa pa'ga pkala's nvxihtçxa Dxus tasxte misxawedwe. Txā'wēme' adxa' dud i'kwe'sx tasxna yuhçxa, txā'wē ewmée fxi'zesawe'sxtxi kastigaĩ'nja espada pdxi'p zeksa ji'pthu txāaju.

17 Kxtey nwēese'jwa'jsa ūščxa', mwēese'jwe Dxus Espiritu' na'wēk we'we' Dxus luučxtxi: Ewmeesa yu'sa' nwēese'jmée jxuka knaysawe'sxtxi's ūsu'nja maná ū'nisa jxaawni ūsa' txā'sna. Sa' teeçx kwet çxihme ūsu'nja, sa' txāa kwette yu' yase u'sesa's fxi'jni yuuna kim yuhwa jiyunimeesa naasáa txāa kweta's jxpa'gasa yuuçxáa jiyuna jĩ'k.

### *Tiatira çxhabtewe'sxtxi pta'sxni*

18 Dxus luuçx Tiatira çxhabtewe'sxtxi jxpe'jsa Dxus angela's na'jĩna mfxi'j: Dxus Nçxi'k yafx ipx beeni na'wēsa ji'phsa txajx çxida çam na'wē kwentetesa ji'phsa na'jĩ'k:

19 Dxus dxi'pte i'kwe'sx ma'wē fxi'zesatewa jxuka jiith. I'kwe'sx peeygāani, ūuste jxpubamée Dxusa's yajkxna fxi'zeni, wa'lmée selpiina fxi'zeni txā'wē yūuni's jiith. Sa' nyafxii meeçxa' açxha' thaakwe mjĩina ūsi'kwe.

20 Nawa i'kwe'sx āhmée yūuni's we'wewa'j ji'pthu: Txāa u'y Jezabela's ma'jĩ'çmée i'kwe, txāa u'ya' Dxus kwe'we'jni'sthu pta'sxi' jĩçxa adxna selpisaatx kaypuba'ja'kh pkal kazxsate kaafxize'jna, sa' tajkx ikhçxa Dxus itxĩmeesatx weçxawa'ja' jĩnak kaapiya'ja'.

21 Adxa' txāa u'ya's en ūsthu txāa pkala's nvx-ihtçxa Dxus tasxte sxawedkahn. Nawa txā'wē yūuya' wa'lçxa txāa pkal kazxsateyçxáak fxi'ze'.

22 Txāa pa'ga adxa' txāa u'ya's kastigaĩ'nja, aça' txāa u'y kaapiya'jni's nvxihtmeeçxa', txāawe'sxwa seena' yuh pxthaa yuuwa'j ji'phutxna.

23 Sa' txãa u'y luuçxtxi's ikhe'nja. Txã'wẽ yũute Dxus luuçxa' jxukaysa jiyutxna adxa' txãawe'sx ũus dxiiju yaakxni's jxuka jiyusatewa. Sa' i'kwe'sx teeçxa na'wẽçxah kîh yũusatewa, ka'tuwa txã'wẽy yu'nja.

24 Nawa Tiatira çxhabte ũssa maawa txãa u'y kaapiya'jni's nwẽese'jsamée vxite' na'wẽ eçxthẽ'j kaapiya'jni kim yuhwa jiyunimeesa jî'tx txã'snawa nwẽese'jsameewe'sxa' adx yu'kxpehwa'j peejxmeei'kwe.

25 Nawa ew fxi'zewa'ja's peçxkananuwe adx sxawedpkaçx.

26 Sa' ewmeesa yu'sa' nwẽese'jmée kîhtewa jxuka knayçxa adx jxthãasniçxá's nmeh entepkaçx kxtey yuuna fxi'zesa yu'sa' nasa mteewe'sxtxiwa jxuka jxkaajxa' ãjãwa'ja's ũsu'nja,

27 adx Tatawa ma'wẽga adx jxkaajxa' ãjãwa'ja's ũs txã'wẽy. Aça' nasa jxukaysatx seena' yuh juuna' yuuna jxkaajana, kiwee mitxh açxamée ewsa's ma'wẽga ya'udu' txã'wẽyçxáa yuuni yuutxna.

28 Sa' khikhiiçte kãasa estrelxa'swa ũsu'nja.

29 Kxtey nwẽese'jwa'jsa ũçxa', Dxus Espiritu' na'wẽk we'we' Dxus luuçxtxi txã'sna mwẽese'jwe jî'k.

### 3

#### *Sardis çxhabtewe'sxtxi pta'sxni*

1 Dxus luuçx Sardis çxhabtewe'sxtxi jxpe'jsa Dxus angela's na'jîna mfxi'j: Dxus tasxte ũssa



sietesatx jxkaahsa txajx kusete yu' siete estrelx-atx atçxa ũssa na'jĩ'k: Dxus dxi'pte i'kwe'sx ma'wē fxi'zesatewa jxuka jiith. İtxĩ ũstha'w jĩna jxtuhthe i'kwe fxi'ze', nawa uunıı na'wē ũsi'kwe.

<sup>2</sup> Çxhãçxha fxi'zewa'ja's miıyajkxwe. Txã'wēme', Dxus yakh fxi'zewa'j yu'sa' kĩhnawa jxuka ivxiituwa'theçxáa yã'j ũsi'kwe. İıuythu Dxus dxi'pte i'kwe'sxa' ewmée i'kwe fxi'ze'. Pkala's nvxihtçxa Dxus tasxte misxawedwe.

<sup>3</sup> Sa' i'kwe'sxtxi ew kaapiya'jni's yajkxçxa txã's yuuçxáana kxtey yuuna mfxi'zewe. Txã'wē jxpa'yakxmeete', adxa' kus peswée na'wēçxáa pa'ja'nja i'kwe'sx tasxte, kim yuhwa jiyunimeete.

<sup>4</sup> Txã'wēçxawa kxtee Sardis çxhabte maz nasa yu' athni ropa khũuçxhi'jnimeesatx ji'phi'kwe, aça' txãawe'sxa' adx yakh fxi'zetxna ropa çxihmesa athçxa, txãawe'sxa' txã'wē fxi'zewa'jsata'.

<sup>5</sup> Ewmeesa yu'sa' nwēese'jmée kĩhtewa jxuka knaysawe'sxa' ropa çxihmesa kaathe'jni yu-utxna. Aça' txãawe'sx yasetxi's khukhme'nja багаçxte yuhwa uuwa'jmée İtxĩ fxi'zewa'j libruju, wejxwa txãawe'sx yasetxi's pta'sxna kaa-jiyu'ju'nja adx Tata vxite' txajx angeleswe'sx dxi'pte.

<sup>6</sup> Kxtey nwēese'jwa'jsa ũsçxa', Dxus Espiritu' na'wēk we'we' Dxus luuçxtxi txã'sna mwēese'jwe jĩ'k.

### *Fxiladelfxia çxhabtewe'sxtxi pta'sxni*

<sup>7</sup> Dxus luuçx Fxiladelfxia çxhabtewe'sxtxi jxpe'jsa Dxus angela's na'jĩna mfxi'j: Jxkaahsa Davxid İxavxi's ji'phsa txãa phadeyã'the', kim

yuhwa apha'çme', sa' txãa aphte', kim yuhwa phade'çme' txã'wẽ isasa's pta'sxsa' na'jĩ'k:

<sup>8</sup> Dxus dxi'pte i'kwe'sx ma'wẽ fxi'zesatewa jxuka jiith. I'kwe'sx fxi'zewa'j dxi'ja's phadeçxa nvxihtthu txã'sa' kim yuhwa aphy'a' ãjãmeena. I'kwe'sxa' Dxus dxi'pte açxamée i'kwe çxhãçxha fxi'ze', nawa adx pta'sxni yu'sa' kxtey yuuna ũsi'kwe adx yu'sa' ahçemée.

<sup>9</sup> Aça' txãa pa'ga i'kwe'sx tasxte peejxũkwekahn kaja'nja eçxthẽ'j nasa judiumeeçxawa judiutha'w jĩna ãsxĩisawe'sxtxi, kxah txãawe'sxa' jiyutxna adxa' i'kwe'sxtxi's peeygãasatewa.

<sup>10</sup> Kĩhtewa jxuka wantãywa'ja's adx jxkaahni's kxtey nwēese'ji'kwe, txãa pa'ga adxa' jx-aawu'nja i'kwe'sxtxi's naa kiwete jxukaysawe'sx ma'wẽ yũutewa jiyuya' nxuswa'j en pa'jana naa kiwe uta txãa ente.

<sup>11</sup> Txaçxmey sxawedu'nja. Ew fxi'zeni's mpa'yajkxwe, kxah txã'wẽ fxi'zepa'ga i'kwe'sxtxi ũswa'j ũsa' txã'sna kim yuhwa kusa'jmeena.

<sup>12</sup> Ewmeesa yu'sa' nwēese'jmée kĩhtewa jxuka knaysawe'sxtxi's adx Dxus tasxtewe'sx seena' çxhãçxhasa vxitu'nja, aça' bagaçxte yuhwa kasehmeetxna txãajũ. Sa' txãawe'sx kakwete fxi'jçxa ki'pu'nja adx Dxus yase vxite' adx Dxus yujuni çxhab yase Jerusalen u'sesa cielutewe'sx txãatx. Sa' adx yase u'sesa'swa txãawe'sx kakwete yuu fxi'jçxa ki'pu'nja.

<sup>13</sup> Kxtey nwēese'jwa'jsa ũsçxa', Dxus Espiritu' na'wẽk we'we' Dxus luuçxtxi txã'sna mwēese'jwe jĩ'k.

*Laodicea çxhabetewe'sxtxi pta'sxni*

14 Dxus luuçx Laodicea çxhabetewe'sxtxi jxpe'jsa Dxus angela's na'jîna mfxi'j: Îsxîsamée kîhtewa jxuka isasaçxá's we'wesa kîh yuhwa meetey ũsyã'kh yu' txã' na'jî'k:

15 Dxus dxi'pte i'kwe'sx ma'wẽ fxi'zesatewa adxa' jxuka jiith. Dxusa's ũusuh jxuka yaakxpa'gamée fxizewa meei'kwe, sa' açxawa meei'kwe. Txã'wẽ yã'jçxa', jxukate fxize yuuwaç wejx ewna, meeçxawa açxa yuuni ewna.

16 Nawa fxizewa meei'kwe, sa' açxawamée wejkuẽçxáa bajxi'kwe, txãa pa'ga adx yuwejũ i'kwe'sxtxi pugaya'wath.

17 I'kwe'sxa' wala ji'phsaçxa kîh yuhwa pee-jxmée wala ewçxáa fxi'zena ũstha'w jî'i'kwe. Nawa kîh yuhwa ji'phmée sũpxçxáa uyya' ãjãmée nxuste wêtmeete yuuçxáa fxi'zeni yu'sa' jiyumée ũsi'kwe.

18 Txãa pa'gath na'wẽ yu'kxpeje': Wala ji'phsa yuu wẽeçxa', adxa'sçxaçxáa mweywe vxyuu beh ew pheu'jnisa. Sũpxçxáa fxi'zeya'mée athwa'j ropa çxihmesanawa mweywe. Sa' yafxtewe'sx yu'çewa mweywe.

19 Adx peeygãanisatxi's juuna'th we'wena yu'kxpeje' jxukaysatx. Txã'wẽ Dxus yakh çxhãçxha fxi'zeya', pkala's nvxihtçxa Dxus tasxte misxawedwe.

20 Mwẽese'jwe, adxa' vxitxte pa'yana ũsthu. Aça' maawa adx we'weni's wẽse'jçxa ka'ga'the', kxtee u'kaçxa txãa yakh fxi'ze'nja, aç'a' txãawa adx yakh fxi'zena.

21 Ewmeesa yu'sa' nwẽese'jmée kîhtewa jxuka knaysawe'sxtxi's adx jxkaahna ũsnite ih

ũswa'jsa vxitu'nja, adxwa ma'wētka ewmeesa's nwēese'jmée jxuka knayçxa adx Tata jxkaahna ũsni pukate kaçx txã'wēy.

<sup>22</sup> Kxtey nwēese'jwa'jsa ũçça', Dxus Espiritu' na'wēk we'we' Dxus luuçtxi txã'sna mwēese'jwe jĩ'k.

## 4

### *Dxusa's cielute weçxana ũsni*

<sup>1</sup> Txãa e'su' ki' thegçxa' uythu cielute vxitx phateçxa ũste. Aça' nyafxii we'weni na'wēy we'weni ki' wēse'th trompeta's seena' sus tukani, sa' na'jĩ'k:

—Ay êete myuh, kxtee kaavxya'ja'jya'wath naa e'su kĩhçxa yuune'thewa txãatx.

<sup>2</sup> Txã'jĩçpkaçxha' txãa dudtey Dxus Espiritu aphniith yuuna pa'j, sa' uythu cielute jxkaahna ũsnisa's.

<sup>3</sup> Txãa jxkaahna ũsnite yu', teeçx kaçxçxa u'pu'k, sa' kxtee u'psa yu' iiméh seena' zhiçxkwe zmeena' kuh jwed khikhyna u'pu'k. Sa' txãa peeku'jsu yu' kxthūs iiméh zhiçxkwe kweethna ũsu'k.

<sup>4</sup> Txãa jxkaahna ũsni pukasu yu' vxite jxkaahna ũsni weintikuatro ähtx ũsu', aça' kxsũ yu' Dxus luuçtxi jxkaahsa weintikuatrosatx u'pu', ropa çxihme athçxa dxikthesu yu' vxyuu bee korona ji'phsa.

<sup>5</sup> Txãa jxkaahna ũsnijũ yu', kpi'sx kweneni na'wēsak kasehna ũsu' seena' susna, sa' jxkaahna ũsni dxi'pte yu' siete ipx pki'tanitx behna ũsu' txãa yu' Dxus tasxte ũssa siete espíritusawe'sxtxi yu'.

<sup>6</sup> Txãa dxi'pteyçxáa mar na'wēsak zhiçxkwe khikhyna ũsu'.

Txãa jxkaahna ũsni pxãhsu vxite' peeku'jsu yu' Dxus vxitnisa ĩtxĭsa pahztxi ũsu', kakwete jxuka yafxçxaçxáa ji'phsa.

<sup>7</sup> Txãa pahzsa nyafxtewe'sxa' león na'wēk yu'. E'stewe'sxa' tulu na'wēk yu'. Tekhtewe'sxa' nasa na'wēk dxi'p ji'phu'. Aça' pahztese'sxa' uh na'wēk fxuusa yu'.

<sup>8</sup> Txãa Dxus vxitnisa pahzsa' teeçxa na'wēçxah seis fxu ku'tatx ji'phu', sa' yafxçxaçxáa kakwete jxukatx ji'phsa yu'. Txãawe'sxa' kus ma'k yuu en ma'k yuu nawa багаçxte yuhwa wahtxmeetx na'jĭna ũsu': Dxus iiméh seena' walasa, Kĭh pkaal yuhwa ji'phmée iiméh seena' atesa, Nyafxĭiwa txãak yu', sa' açxwa txãaiçxá', Sa' txãaiçxáa багаçxtewa nes yuuna jĭnatx we'wena nes yu'.

<sup>9</sup> Sa' kxtee jxkaahna ũsnite kaççxa багаçxteçxáa yuhwa uumée nes yu-uwa'jsa's Dxus vxitnisa txã'wē tuuthe'jna weçxaaçpkaçxha',

<sup>10</sup> Dxus luuçtxi jxkaahsa weintikuatrosawe'sxa' багаçxteçxáa yuhwa uumée nes yuuwa'jsa tasxte peejxūkweçxa txãawe'sx koronatx txajx tasxte ki'pçxa na'jĭnatx weçxana tuuthe'je':

<sup>11</sup> Kwe'sx Dxus idx yuuçxáa jxpa'gawa'jsag weçxana tuuthe'jni's, Txãa pa'gately idxçxaçxáag kĭhnawa jxuka vxit, Aça' iidx peeygãhçxa taki'jnisaçxaçxáa ũsta' jĭ'tx.

## 5

*Libru's phadewa'jsa*

<sup>1</sup> Jxkaahna ũsnite kaçxçxa u'psa' paçu kuseju teeçx eç fxi'jnisa atçxa u'pteth uy. Txãa eç yu' ekaju dxiiju jxuka fxi'jçxa wala ew pelçxa siete selxo yakhku aphni yu'.

<sup>2</sup> Sa' teeçx angel iiméh seena' çxhãçxhasa ũste uythu, txãa yu' na'jĩnak paapēyi' sus we'wena:

—Txãa eç siete selxo yakh aphnisa's çkim sudeçxa phadeya' ãjãkx? jĩ'k.

<sup>3</sup> Nawa cielutewe'sx, naa kiwetewe'sx, naa kiwe dxiijuwe'sx kimçxáa yuhwa txãa eça's phadeya' ãjãwa'jsameetx yu', sa' thegya'çxáa yuhwa ãjãwa'jsameetx yu'.

<sup>4</sup> Txã'wē txãa eça's phadeçxa thegya'çxáa yuhwa ãjãwa'jsamée yuupa'ga, adxa' wala ũ'nena ũsu'th.

<sup>5</sup> Aça' kxtee jxkaahna ũssa teeçxsa' na'jĩ'k:

—Jwee yu' ũ'nenu. Teeçx ũsa' Juda nwe'sx, jxkaahsa Davxid ji'thewe'sx wala jxtuhthesa txã' ewmeesa's jxuka knayku, txãa siete selxotx sudeçxa eça's phadeya' ãjãya' jĩ'k.

<sup>6</sup> Txajũ' jxkaahna ũsni pxãhte vxite' Dxus vxitni itxĩsa pahz ũsu'tx vxite' Dxus luuçxtxi jxkaahna ũssawe'sx txã'wēsawe'sx ksxavxyte Piisxakuē na'wēsa yujuçxa ũste uythu. Txãa yu' kpã'vxitçxa ikhni snxalwa ji'phu'k, sa' siete kaaçxu siete yafxku ji'phu'. Txãa siete yafx yu' na'wē Dxus tasxte ũssa siete espiritutx naa kiwete jxuka kaahni yuutx txãatx yu'.

7 Txajũ' txãa Piisxakuẽ jĩnisa' u'jçxa jxpa'gak na'wẽ jxkaahna ũsnite u'psa' paçu kusete eç yaat yu'k txãa eçna.

8 Txajũ' txãa eça's jxpa'gaçpkaçxha', Dxus vxitni pahz ãtxĩsa vxite' Dxus luuçxtxi jxkaahsa weintikuatrosawe'sxa' peejxũkwetx txãa Piisxakuẽ jĩnisa tasxte. Txãa jxkaahsawe'sxa' teeçxsa na'wẽçxah tukani arpa ji'phu'tx, sa' vxyuu bee kopawa ji'phu'tx. Txãa vxyuu bee kopasũ yu' dxuus yatte kabnisa inciensoçxaçxá's uta abnisa'stxi ji'phu'. Aça' txãa yu' Dxusa's peçxkanamée puutx we'wena ũsni jĩnisak yu'.

9 Sa' memtxi teeçx mem u'sesa na'jĩna:

Idxa' txãa eça's jxpa'gaçxa selxotx sudeya' ãjãwa'jsag,

Txãa pa'gatey ikhni yuuçxa iidx eeju kwe'sxtxi's weygu

Maa nasa ma'wẽsa, yuwe ma'wẽ we'wesa, mteewe'sxwa jxuka Dxus luuçx yuuya' ãjãkahn.

10 Sa' kwe'sxtxi's jxkaahwa'jsag vxitna pa'j vxite' sacerdote kwe'sx Dxus tasxtewe'sx,

Aça' naa kiwete jxkaajxa' ãjã'nja'w jĩ'tx.

11 Txajũ' ki' thegçxa' wẽse'th angeleswe'sx iiméh seena' kuhsa we'weni's. Txãawe'sx yu' jxkaahna ũsni peeku'jsu vxite' Dxus vxitni ãtxĩsa vxite' Dxus luuçxtxi jxkaahna ũssawe'sx peeku'jsutx ũsu'. Txãawe'sxa' iiméh seena' wala kuh yu'tx.

12 Sa' na'jĩnatx sus we'we':

Piisxakuẽ na'wẽ ikhni yuunisa's bagaçxtewa pu'vxitumée weçxana tuuthe'jna ũswa'ja'.

Sa' txãçxaçxáa jxuka jxpa'gawa'jsa', jxkaahsa yuuwa'j, wala seena' ji'phsa yuuwa'j.

Kĩhtewa jxuka jiisa, iiméh çxhãçxhasa txã'wě yuuwa'jsa' jĩ'tx.

<sup>13</sup> Sa' Dxus taki'jni cielutewe'sx, naa kiwetewe'sx, naa kiwe dxiijuwe'sx, martewe'sx kxtee kĩhçxah ũstxna txã'wěsa jxuka na'jĩna we'weni'swa wěse'th:

Weçxana tuuthe'jwa'ja' jxkaahna ũsnite kaçxçxa u'psa's vxite' Piisxakuē na'wě ikhni yuuk txã'sna.

Sa' jxtuhthe jxkaajxa' ājāwa'jsa' багаçxtewa jĩ'tx.

<sup>14</sup> Aça' txã'jĩçpkaçxha', Dxus vxitni ĩtxĩsa pahzsa':

—Txã'wě kxtey yuuna jĩ'tx. Naapkaçxha' Dxus luuçxtxi jxkaahsa weintikuatrosawe'sxa' pee-jxũkweçxa weçxana tuuthe'je'tx багаçxteçxáa yuhwa uumée nes yuuwa'jsa's.

## 6

### *Siete selxotx sudeni*

<sup>1</sup> Txajũ' uythu Piisxakuē jĩnisa' siete selxo nyafxtewe'sxa's sudeçte, sa' wěse'th Dxus vxitni ĩtxĩsa teeçxsa' seena' sus na'jĩna:

—Yuhçxa mtheg jĩni's.

<sup>2</sup> Aça' txã'wě wěse'jçxa', thegçxa uythu teeçx jiba çxihmesa's, kxtee a'jsa yu' kusete ũpanisa arko yaasesa'sku ji'phu'. Txajũ' txã'sa' teeçx koronak ũsni yuu, aça' txãa yu' kĩhtewa jxuka puiiya' jiisak kaseh, mteewa puiiçxa knaywa'jsa.



3 Txajũ' Piisxakuẽ j̃nisa' vxite selxo's sudek e'stewe'sxna, aça' wẽse'th Dxus vxitni ãtxĩsa e'zsatewe'sx na'jĩna:

—Mtheg j̃ni's.

4 Sa' uythu vxite jiba behsa kasejeçte, aça' kxtee a'jsa yu's jxkaahnik yuu, naa kiwete wẽt fxi'zeni's ivxiitute nasaa pwe'sx puutx ikhna u'khan. Sa' teeçx espada walasak ũsni yuu.

5 Txajũ' Piisxakuẽ j̃nisa' vxite selxo's sudek tekhtewe'sxna, aça' wẽse'th Dxus vxitni ãtxĩsa tekhsatewe'sx na'jĩna:

—Mtheg j̃ni's. Aça' uythu vxite jiba khũçxsa's aça' kxtee a'jsa yu' kusete isanisa balansa yaas-esa'sku ji'phu'.

6 Sa' wẽse'th Dxus vxitni ãtxĩsa ksxavxyu teeçx na'jĩna we'weni's:

—E'z libra skuutxhçxáana teen mj̃iinite ãhpa'ga txweywa'j yuuna, sa' seis libra cebada'swa txakwey pa'gate txweywa'j yuuna. Nawa aceite vxino txã'wẽsa yuutxi'sa' ivxiitupu'n j̃i'k.

7 Txajũ' Piisxakuẽ j̃nisa' vxite selxo's sudek pahztewe'sxna, aça' wẽse'th Dxus vxitni ãtxĩsa pahzsatewe'sx na'jĩna:

—Mtheg j̃ni's.

8 Aça' txã'wẽ wẽse'jçxa' thegçxa uythu teeçx jiba seena' ũukhũukhsa's, aça' kxtee a'jsa yu' Ikhsa j̃na kxsusni yasek ji'phu'. Naapkaçxha' txãa e'ste' uusaawe'sx yujuni j̃nisak vxyaa. Txãa jibate a'jsa yu'sa' jxkaahnik yuu naa kiwete nasatx puupxãhn ãatuw ikhkahn gweçxa vxitçxa wẽjẽ kaapa'ja'jçxa weewa txã'wẽy kaapa'ja'jçxa yu'kh eçx juuna'sawa kaapena'jçxa.

<sup>9</sup> Txajũ' Piisxakuẽ j̃nisa' vxite selxo's sudek tahçtewe'sxna. Aça' Kristo's selpiipa'ga ikhni yuutx txãawe'sxçxaçxáa altal tasxte üsteth uy.

<sup>10</sup> Sa' txãawe'sxa' na'j̃inatx sus we'we':

—Kwe'sxtxi jxpe'jsa atesa idxa' k̃htewa kxtey yuusáa ¿makwe txaçx jxthēeyuuya'waga, kwe'sxtxi ahçeçxa ikhtxi txãawe'sxtxi kastigãyya'? j̃ite',

<sup>11</sup> pasçxa':

—Ãçxhíi yu' ũuçxkwe uythásna jxkaasena meswe, Kristo's selpiipa'ga i'kwe'sx na'wēy ikhni yuuwa'j peejxta' txãawe'sxtxi kxtey yuuna jxã'phkaçx j̃çxa', ropa çxihmesatx kaathe'jni yuu.

<sup>12</sup> Txajũ' Piisxakuẽ j̃nisa' vxite selxo's sudek seistewe'sxna. Aça' uythu seena' ehd u'jweçte seka' jxuka khũçx k̃ajk kweethmeepkaçx, a'tewa jxuka ee na'wēk beh yuu.

<sup>13</sup> Naapkaçxha' cielute estrelxa' ũsxitx naa kiwete, fxtũ ỹnwa ma'wēta wejxa çxhãçxha kēese'the jxuka ũsxi' txã'wētx yuu.

<sup>14</sup> Aça' cielu' eç na'wē jxuka pelni yuuçxa vxyaame'. Naapkaçxha' thã'j vxiç vxite' íkh pxãhsu kiwe u'psa jxuka upenitx yuu ēse'sete.

<sup>15</sup> Aça' naa kiwete jxkaahsawe'sxa' wala ũukhçxa kiwe kafxsu vxite' kwet kafxsu jxuka jxsũuthtxi, walasawe'sx, ji'phsawe'sx, npiiçthē'jwe'sx, jxtuhthesawe'sx, vxite' patron kusete selpiina fxi'zesawe'sx vxite' patron ji'phmée wēt fxi'zesawe'sx jxukatx txã'wē yũu.

<sup>16</sup> Sa' txã'wē yũuçxa thã'j vxiç vxite' kwet penxatx na'j̃inatx we'we':

—Kwe'sxtxi jxuka akaačxçxa kaavxya'ja'jnu na'wē jxkaahna u'pa' txajx dxi'pte, vxite' Piisx-akuē jīnisa seena' yuh kastigāyya' ūsa' txā'wēsa dxi'pte.

<sup>17</sup> Txā'wēme', txā'wē seena' kastigāywa'j en ājk, aça' ħkim kxte' wantāyya' ājākx? jī'tx.

## 7

### *Israelita ji'jwe'sx iisawa'jniitx yuu*

<sup>1</sup> Txāa e'su' pahz angeleswe'sxtxith uy, txāawe'sxa' naa kiwe peeku'the puutx pahz ahtetx yujuçxa ūsu', naa kiwete pahz ajū wejxa kasehsatx ka'ga'jmée yupna, naa kiwete, marte, yu'khsu mtee yuhwa wejxakahmen.

<sup>2</sup> Sa' vxite angel uythu txāa yu' sek kāani ju'guk yuh yu', Dxus itxīsa selxo's atçxa. Txāa Dxus angela' susku we'we pahz angeleswe'sx ūsu'tx naa kiwe vxite' mar txāatx suwwa'jsatx na'jīna:

<sup>3</sup> —Naa kiwe, mar, yu'kh mtee yuhwa āçxhīi yu' suwnuwe, Dxusna selpisaawe'sx dxikthesu kwe'sx iisawa'jmeyna yu' jī'k.

<sup>4</sup> Txajū' wēse'th Israelita ji'jwe'sx iisawa'jnisa jxuka yu' ciento kuarenta y quatro miltxi yu'.

<sup>5</sup> Judá ji'j, doce mil; Rubén ji'j, doce mil; Gad ji'j, doce mil;

<sup>6</sup> Aser ji'j, doce mil; Nefxtalí ji'j, doce mil; Manasés ji'j, doce mil;

<sup>7</sup> Simeón ji'j, doce mil; Levxí ji'j, doce mil; Isakar ji'j, doce mil;

<sup>8</sup> Zabulón ji'j, doce mil; José ji'j, doce mil; Benjamín ji'j, doce mil; txāawe'sxtxi jxukaçxah yu' txazkuē yu'.

*Maa nasawa Dxus nwe'wenisawe'sx*

<sup>9</sup> Txãa e'su' ki' thegçxa' nasa iiméh wala kuh uythu. Txãawe'sxa' maa nasa ma'wěsa majũwe'sxwa jxukatx yu', yuwe fxiyfxiyçxah we'wesa. Sa' Piisxakuẽ jñisa jxkaahna u'pni peeku'jsutx yujuçxa ũsu'. Txãawe'sxtxi' kim yuhwa isaya' ãjãmeeta', iiméh wala kuh yu'tx txãa pa'ga. Sa' ropa çxihmesa athçxa kusesu yu' lamus eçnatx yaat yu'.

<sup>10</sup> Txãawe'sx jxukaysa na'jĩnatx sus we'we':  
Kwe'sx Dxus jxkaahna u'pa' vxite' Piisxakuẽ  
jñisa txãawe'sx yuuçxáatx ewte  
neeyũuwa'ja's ũs jĩ'tx.

<sup>11</sup> Aça' Dxus jxkaahna ũsni peeku'jsu vxite'  
Dxus luuçxtxi jxkaahsawe'sx peeku'jsu vxite'  
Dxus vxitni ãtxĩsa pahz ũsu'tx txãa peeku'jsu an-  
geleswe'sx yujuçxa ũssa' jxkaahna ũsni ju'gu ki-  
wete pa'j kũçuçxa Dxusa's na'jĩnatx neewe'we':

<sup>12</sup> Weçxana tuuthe'jwa'ja' kwe'sx Dxusa's.

Txãaçxáa kĩhtewa jxuka jiisa'.

Txã' багаçxtewa çxhãçxhasa jxtuhthe jxkaajxa'  
ãjãwa'jsa' jĩ'tx.

<sup>13</sup> Txajũ' Dxus luuçxtxi jxkaahsa teeçxsa'  
na'jĩnak adxa's pẽjx:

—Na'wě ropa çxihme athçxa ũsta' txãawe'sxa'  
¿kimtxna, sa' majũ yuusatxna? jĩte':

<sup>14</sup> —Txãawe'sxtxi' idxíçxáa jiine'ga jĩnath pas.  
Aça' txã' na'wěk pta'sx:

—Txãawe'sxa' iiméh seena' wala nxuste  
skhẽwsaata', sa' txãawe'sx athni ropatxi's  
thethçxa Piisxakuẽ jñisa ikhni yuuk txajx eete  
yaatesata'.

15 Txãasa Dxus jxkaahna ũsni tasxte ũsta', en ma'k yuu meeçxa' kus ma'k yuu nawa багаçxtewa selpiina nes yuuwa'jsata'. Aça' kxtee jxkaahna u'psa yakh ũssa' kĩhte yuhwa peejxmée fxi'zetzna.

16 Txãa pa'ga txãawe'sxa' açxha' pxthaa yuumeetxna wēena yũ'wēena. Sa' sektewa çxhavxyna yaaçxana fxi'zemeetxna,

17 txãa pa'gatey Piisxakuē jīnisa jxkaahna ũsni ksxavxyte ũsa' txajx jxpe'jni yuutxna. Sa' yu' багаçxte yuhwa pçuwa'jmeesa's yusni yu-utxna. Aça' Dxusíi txãawe'sx ũ'neni yafx yu'txi's khukhuna jĩ'k.

## 8

### *Selxo sietetewe'sxa's sudeni*

1 Txajũ' txãa Piisxakuē jīnisa' vxite selxo's sudek sietetewe'sxna. Naapkaçxha' cielute kīh yuhwa susmée sxuuna'k yuu, media ora āhpkaçx.

2 Txã'wē yũuni skhēwniijũ' siete angeleswe'sxtxi uythu Dxus tasxte yujuçxa ũste, aça' txãawe'sxtxi'sa' jxukaysatx tukani trompeta ũsnitx yuu.

3 Txã'wē yuuçpkaçxha' Dxus angel vxite kũjk vxyuu bee kopa's atçxa, sa' altal tasxtek yuju. Aça' seena' wala ũsni yuuk txãa vxyuu bee kopate abçxa kabwa'ja's. Txãa yu'sa' vxyuu bee altal ũsu'k jxkaahna ũsni tasxte kxtee kabwa'kh yuu, Dxus luuçx jxukaysawe'sx Dxus yakh puutx we'weçpkaçxha' kabkahn.

4 Aça' Dxus angel txã'wě kabte', txãa ah yu' Dxus tasxte pa'kh tejka, Dxus luuçx jxukay-sawe'sx Dxus yakh puutx we'weni yã'jçxa.

5 Txajũ' txãa Dxus angela' txãa vxyuu bee kopate utak çxhã'çxha ipx ji'phsa's äsx kxtee altaltewe'sxna, sa' txã'wě yũuçxak kiwe kajkwesu êesu yahta. Aça' txã'wě yuuçpkaçxha', kpi'sx seena' kwehna sus we'wena, ehdwa txã'wěk seena' u'j.

*Siete angeleswe'sx trompetatx tujkaya' yujuni*

6 Txajũ' txãa siete angeleswe'sxa' trompetatx tujkaya' yujutx.

7 Aça' Dxus angel nyafxtewe'sxa' txajx trompeta's tujkak, naapkaçxha' naa kiwete kwetuba äsxku ee ka'dnisa vxite' ipx yã'jçxa. Aça' naa kiwe pxãhn äatuwku çxhavxy, yu'khwa txã'wěy jxuka.

8 Txajũ' Dxus angel e'ztewe'sxwa txajx trompeta's tujkak, naapkaçxha' thã'j vxiç wala na'wěsa ipxçxaçxáak behna ũsu' txã'snak marte akhni yuu. Txã'wě yuute', mara' pxãhn äatuwku eeçxaçxáa yuu.

9 Aça' kxtee kñhçxah ne'ta ãtxĩsa ũsu' txãa yu' jxuka uutx mar eeçxaçxáa yuunisatewe'sx yu'. Aça' barkowa pxãhn äatuwtxi vxitu.

10 Txajũ' Dxus angel tekhtewe'sxwa txajx trompeta's tujkak, naapkaçxha' cieluju teeçx estrelxa seena' walasa wetek ipxçxaçxáa behna. Yu'walasu vxite' yu'le'çxkuěsuwa naa kiwete pxãhn äatuwku pēethehna wete.

11 Txãa estrelxa' Seena' Yaasak yaase yu', aça' naa kiwete pxãhn äatuwtxi yu'a' yaasaçxaçxáa

yuu. Aça' nasa' seena' wala uutx, txã'wẽ yu' yaasaçxaçxáa yuupa'ga tudxya' ãjãmeeçxa.

<sup>12</sup> Txajũ' Dxus angel pahztewe'sxwa txajx trompeta's tujkak, naapkaçxha' sekwa puupxãhn ãatuwku kweethmée neeyũ. Aça' a'te, estrelxawa txã'wẽyçxáatx puupxãhn ãatuw kweethmée neeyũ. Aça' txãa suwenisa yu' kweethmeeta'. Aça' en yu' wejkuẽ yuuçxáak khikhyna neeyũ, naapkaçxha' kus yu' jweeíçxáak seena' çxhi'dxsa yuu.

<sup>13</sup> Txajũ' thegçxa' uythu Dxus angel cielusu fxuhna u'jweçte seena' sus we'wena na'jĩna:

—Dxus angel tekhsawe'sx trompeta's tukani susuçpkaçxha', seena' yuh ũukhũukhsa yuuna naa kiwete ũssa yakha' jĩ'k.

## 9

<sup>1</sup> Txajũ' Dxus angel tahçtewe'sxwa txajx trompeta's tujkak, naapkaçxha' uythu cieluju estrelxa naa kiwete weteçte. Aça' txãa wetesa estrelxa's lxavxi's ũsniç yuu, kafx seena' dxi-isatewe'sxna.

<sup>2</sup> Txajũ' txãa kafx seena' dxiisa's phadek, naapkaçxha' orno walate ah na'wẽk kaseh, sa' txãa aja' jxuka nuyçxhi'dxku sekna vxite' ãesu jxuka.

<sup>3</sup> Txãa ahte yu' khã'sxtxi kaseh naa kiwete jxuka fxuhna. Aça' txãa khã'sx yu' yãjaya' ãjãwa'jsatx yu', usmitx ma'wẽta aka yãja' txã'wẽ.

<sup>4</sup> Nawa naa kiwete fxtũ tasx, jxũth tasx çẽysa yu'sa' kĩh yuhnawa suwwa'jsameetx yu', naasáa Dxus selxo's dxikthesu maa yuhwa ji'phmeesaçxaçxá'stxi yãjawa'jsa yu'.

5 Nawa nasatx ikhwa'jsa yu' yu'çmeeta', naasáa tahç a'te ähpkaçx seena' wala kaaka'jwa'jsaçxáatx yu'. Sa' txãa akasa yu' usmitx yäjani na'wē seena' aka yuuwa'jsatx yu'.

6 Txãa ensu' nasa' uuwa'ja's pakweçxawa, uymeetxna. Makwe uuwa'ja's pakwetewa, txãawe'sxtxi' uu en pa'jmeena.

7 Txãa khã'sxa' jibatx gweçxate puiiya' u'jweççxa pheu'jnisa na'wēttx yu'. Dxikthesu yu' vxyuu bee korona na'wēsatsx ji'phu', sa' dxi'pa' nasaa dxi'p na'wēttx yu'.

8 U'y na'wēttx ya'iidxkhas yu', sa' txãawe'sx ki'tha' león ki'th na'wēsatsx ji'phu'.

9 Txãawe'sx kakwe yu' çam na'wēsaçxaçxá'stxi ya'iiphuph yu', sa' txãawe'sx fxujaçte susni yu' kaçxetilxa jiba wezxnisa kuhsa u'jweççxa ma'wē susukx txã'wēttx susu'.

10 Sa' txãawe'sx mez yu' usmitx mez na'wēttx yājawa'j ji'phu', nasatx yājaçxa tahç a'te uta kaaka'jwa'jsa.

11 Txãa khã'sxa' teeçx ne'jwe'sx ji'phu'tx, kafx seena' dxiite üssa. Txãa ne'jwe'sxa' hebreo yuwete yu' Abadonku yaase yu', sa' griego yuwete' Apolionku yaase yu' meeçxawa Ivxiitusa jīnisa.

12 Txajū' Juan we'weçxa':

—Nyafxte seena' ũukhūukhsa yu' skhēwku, nawa e'zīi peejxta' jī'k.

13 Txajū' Dxus angel seistewe'sxwa txajx trompeta's tujkak, naapkaçxha' Dxus tasxte vxyuu bee altal pahz vxiçsu we'weni pthūusek.



14 Sa' Dxus angel seistewe'sx trompeta ji'phu'k txã'sa' na'jĩnak jxkaahni yuu:

—Pahz angeleswe'sx tudni ũsta' Eufxrates yu'wala pukate txãawe'sxtxi' mitxhwete jĩna.

15 Txajũ' txãa angeleswe'sxtxi'sa' txhwetenitx yuu, nasa naa kiwetewe'sxtxi puupxãhn áatuw ikhkahn. Txã'wẽ yũuwa'jsa ne'ta pheu'jni ũsu', kĩh ora, maa ente, kĩh a'te, maa anxute txã'wẽ yuuwa'jsaçxawa txãa en áhtewe'sx.

16 Txajũ' txãa jiba seena'su a'jsatx jiyuth. Txãawe'sxa' seena' wala kuh yu'tx, dos cientos milxones.

17 Na'wẽ jiba seena'satx uythu, açã' txãa jibate a'jsa yu' puiiwa'j txãawe'sx peçxusu ya'phuphnisa ji'phu'tx tekh jwed, teeçxsa' beh, vxite' çey, vxite' lemsa. Açã' jiba yu' león na'wẽtx ya'iidxiktheh yu', sa' yuwesu yu' ipx vxite' ah vxite' asufxre txã'wẽsatx kasehna ũsu'.

18 Açã' naa kiwete nasa puupxãhn áatuwtxi uu, txã'wẽ jiba yuwesu tekh jwed kasehçxa ikhpa'ga.

19 Txãa jiba' yuweju vxite' mezuhtx ewmée yũuwa'ja's ji'phu'. Txãawe'sx meza' ul na'wẽtx yu' dxikthé ji'ph, txãasatx txãaju ikhya' ájã'.

20 Nawa txãa ewmeesa vxyaatx txãate uusaamée nasa yu' txãawe'sx ewmée yũuna fxi'zeni's nvxihtmeeta'. Eçxthé'j jxkaahni'swa peçxkanamée nwẽese'jna nestxi yu'. Sa' vxyuu beh, vxyuu çxihme, çam, kwet, fxtũ, txãatxtxi nasa na'wẽ piisaçxa neewe'wena nes yu'. Txãa piisanisa' uysaawameeta', sa' wẽse'jsawameeta', u'juya'wa ája'çmeeta'.

21 Sa' ikhna fxi'zeni'swa nvxihtmeeta', sa' dx-ijxuuna, kazx pkal yuuna, pesweena txã'wẽ yũunisatxwa nvxihtmeeta'.

## 10

### *Dxus angel kusete libru ji'phsa*

1 Txajũ' Dxus angel vxite uythu seena' çxhãçxhasa cieluju tâaph pxãhte kĩaçte, sa' dxikthete yu' kxthũusku ji'phu'. Txajx dxi'pa' sek na'wẽk kweethe', sa' txajx çxida yu' ipx na'wẽçxaçxáatx yu'.

2 Kusete yu' libru le'çxkwesa'sku phadeçxa ji'phu', sa' paçu çxidaju yu' martek yuju, sa' jebu çxidaju' kiwetek yuju.

3 Txã'wẽ yũuçxak sus we'we león pebeeçxa ma'wẽ sus seena' pebeekx txã'wẽ. Sa' txã'wẽ seena' pebeeçpkaçxha', siete kpi'sx we'wenik pthũuse.

4 Txã'wẽ siete kpi'sx we'weni's jiyuçxa', fxi'jya'wath yu'. Nawa cielujũ na'jĩna we'weni'sthu wẽse'j:

—Txãa siete kpi'sx we'wenitx jiyug txãatxi's kim yuhtxwa pta'sxna fxi'jnu jĩ'k.

5 Txajũ' txãa Dxus angel marte vxite' kiwete yujuçxa ũssa' paçu kuse's cielute kiisçxa

6 jurãyku багаçxte yuhwa uumée itxĩ fxi'zewa'jsa na'wẽ kĩaçte jxuka vxitku txajx yase's kxsusçxa na'jĩna:

—Açxha' jwee yu' jxthẽeyuumeena.

7 Dxus angel sietetewe'sx txajx trompeta's tujkaya' takheçpkaçxha', nmeh ente ma'wẽ yũuwa'ja's ne' Dxusa' pheu'jçxa ji'phu' txã'

jxuka kxtey yuuna. Sa' Dxus yuwe's pta'sxna selpisaawe'sxtxi ma'wēne' pta'sx txāa yu' jxuka kxtey yuuna jīk.

<sup>8</sup> Cielujū we'weçxa' eçte kuçx fxi'jnu jīk txā' ki' we'wek adx yakh na'jīna:

—Dxus angel na'wē paçu çxida's marte txahçxa vxite çxida's kiwete txahçxa ūssa' kusete libru ji'pha' txāa libru's jxpa'gaya' me'j jīte',

<sup>9</sup> Dxus angel tasxte utxaaçxa txāa libru's pējxthu. Aça' na'jīnak pta'sx:

—Jxpa'gaçxa mē'. Nawa iidx yuwete yu' mil na'wē nxusxa pēethejena, naapkaçxha' iidx tutxhte yu', wala seena' yajana jī'k.

<sup>10</sup> Txajū' Dxus angel kuseju jxpa'gaçxa libru's ū'th, aça' adx yuwete yu' mil na'wēk nxusxa pēetheeh, nawa adx tutxhte yu' seena' wala yaak.

<sup>11</sup> Txajū' na'jīnak jxkaah adxa's:

—Na'wē Dxus kaajiyu'kh txā'sa' pta'sxya' ki' u'jwene'ga, çxhaab iisa, nasa msuuwe'sxwa, fxiyfxiy we'wesa, jxkaahsawe'sx txā'wēsax jī'k.

## 11

### *E'z piçthē'j Dxus yuwe's pta'sxya' kaahnisa*

<sup>1</sup> Txajū' isani khīh ūsçxa na'wēk jxkaah:

—Dxuus yat vxite' altal txāa makwetewa jiyuya' miisa, sa' Dxusna neewe'weya' kxtee u'kasa maazkuēetewa jiyuya' miisa.

<sup>2</sup> Nawa Dxus yatte patxu ekajuwe'sx yu'sa' isanu. Txā'wēme' txajuwe'sxa's vxite nasatxku ūsni yuu, aça' txāawe'sxa' jxuka suwuutxna Dxus çxhab atesa's kuarenta y dos a'te āhpkaçx.

3 Naapkaçxa' adxna selpisáa e'z kaja'nja, adx yuwe's mil doscientos sesenta en ãhpkaçx pta'sxna ũskahn. Txãawe'sxa' nasa uute nxusna athnisa ropa khũçxa ji'ph yuutxna.

4 Txãa e'zsawe'sxa' e'z oliwo fxtũ tasx ũsu'tx txã'wēsata', vxite' bela txaahni e'z ũsu'tx naa kiwete Dxus tasxte txã'wēsaiçxáata'.

5 Txãawe'sxtxi' maaí yu' ppxuu wējēwáatxna, nawa txãawe'sx yuwesu ipx kasehçxa jxuka kabuna açesawe'sxtxi's. Aça' txã'wē yūute', maawa ppxuu wēesa' uu en ji'phutxna.

6 Aça' txãa selpisaawe'sxa' cielu's aphy'a' ãjãwa'jsata', Dxus yuwe's pta'sxwa'j en pçuupkaçx nus pa'khamen. Sa' yu'a'swa eeçxaçxáa vxit-ya' ãjãçxa seena' wala kxūusu'jwa'jsata' naa kiwete kīh weewa nuypa'jna, txãawe'sxtxi ma'wē yūuweçxtewa txã'wē yūutxna.

7 Nawa txãawe'sx mjīia's jxã'jaçpkaçxa', eçx iiméh seena'sa kafx seena' dxiijũ kãhçxa txãawe'sxtxi puiiçxa knayçxa ikhena.

8 Txãawe'sx uuníi kakwe's na'wē kwe'sxtxi jxpe'jsa kluuste uuk txãa çxhab wala klxiikhunsu wãataani yuutxna. Txãa çxhaba's Sodoma vxite' Egipto na'wēsa' jī'tx.

9 Aça' tekx en ēepxãh ãhpkaçx nasa maa çxhabuwe'sx, ma'wēsa fxiyfxiy we'wesa, maa kiwejuwe'sxwa jxukasa txãa uuníi kakwetxi's uyuutxna, nawa kaapeda'j yu' meetxna.

10 Txajũ' nasa naa kiwetewe'sxa' seena' wala weçxaatxna txã'wē uupa'ga, sa' txã'wē weçxaweete txãawe'sx ji'phuni's puutx peesutxna. Txãawe'sx yakh yu' iiméh seena'

wala ewmeesa na'wēsa yuutxna txāa e'z piçthē'jsa Dxus yuwe's pta'sxna ũssawe'sxa', txāa pa'ga uute' wala weçxaatxna.

<sup>11</sup> Nawa uuníi tekhn en ēepxāh skhēwniijũ', Dxusa' itxĩ vxitku aça' ki' kiitetx. Txā'wē yũute', iiméh seena' wala ũukhtxi jxukaysa uyna ũssawe'sxa'.

<sup>12</sup> Txajũ' txāa e'z selpisaawe'sxa' wēse'jtx seena' sus we'weni cielujũ na'jĩna:

—Ayte cielute ēete myuhwe jĩçpkaçxha', tãaph pxāhte u'jçxa cielute tejkatx, txāawe'sxtxi açesawe'sx uyna ũste.

<sup>13</sup> Txā'wē yuuçpkaçxha', seena' wala ehd u'jçxa txāa çxhaba's ma'wē yu' suwçxa ejx jxũna u'kh, aça' siete mil nasatx uu txāa ehd u'pha'ga. Txā'wē yũute', nasa neeyũusa' iiméh seena' wala ũukhçxa Dxus cielute ũssa's pxthaa we'wena tuuthe'jtx.

<sup>14</sup> Txajũ' Juan we'weçxa': Seena' ũukhũukhsa e'ztewe'sx yu' skhēwku, nawa jxthēeyuumeena tekhtewe'sxwa jĩ'k.

### *Trompeta sietetewe'sx*

<sup>15</sup> Txajũ' Dxus angel sietetewe'sxwa txajx trompeta's tujkak, aça' seena' sus we'wenisa pthũuse'tx cielujũ na'jĩna:

Naa kiwete jxkaahna ũsnisa' jxuka kwe'sx Tata vxite' txajx Txhitxhnisa Kristo txāawe'sx jĩiçxaçxáatx yuuna pa'j.

Aça' ãçxha' txāaçaçxáa jxkaajana bagaçxtewa jĩnatx we'we.

16 Txajũ' Dxus luuçxtxi jxkaahsa weintikua-trosawe'sx Dxus jxkaahna ũsnite ũssa' kiwete kiiçuçxa Dxusa's neewe'wetx najĩna:

17 Kwe'sxtxi jxpe'jsa idxa's weçxa'tha'w, Dxus iiméh seena' walasag.

Idxa' nyafxíiwa idxíiçxáag yu', sa' ãçxwa txãaiiçxáag, sa' bagaçxtewa idx yuuçxáa nes yuuwa'jsag.

Txãa pa'gately kíhtewa jxuka ãjãwa'ja's idxçxaçxáa ji'phgu,

Txãasa ãçxha' jxkaahna ũsgu.

18 Naa kiwete nasa' idxa's ahçetx, nawa txãawe'sxtxi kastigãywa'j ena' ãjk.

Aça' txã'wëy uusaawe'sxtxiwa kastigaĩne'ga.

Sa' walasa ma'tx yuu meeçxa' le'çxkwesa ma'tx yuu nawa idx yakh txutemée fxi'zeçxa iidx yase's açewe'wesameewe'sxtxi' de-weene'ga ew yũuna iidx yuwe's pta'sxna selpiina fxi'zepa'ga.

Naapkaçxha' naa kiwete suwna ũssawe'sxtxi's ka'tu' ivxiitune'ga jĩnatx we'we.

19 Txajũ' cielute Dxus ũsni phatek, aça' na'wë Dxusa' nasa yakh puutx we'wek txãa puutx we'weni's fxi'jçxa kajate jxaawni yuuk txãa kaja' vxyaak. Naapkaçxha' kpi'sx kwehneçxa seena' susku kwetuba seena' wala ãsxna, aça' ehdwa u'kh.

## 12

### *U'ya's eçx seena'sa ikh wëeni*

1 Txajũ' ãe walaju na'wëk seena'sa vxyaa: teeçx u'y txajx kakwete yu' sekçxaçxáa ji'phsa

a'tete yujuçxak ũsu', sa' dxikthete yu' teeçx korona doce estrelxa ji'phsa'sku ji'phu'.

<sup>2</sup> Txãa u'ya' nasatek açã'aç yu', sa' seena' wala pxthaa yakana pebe'k.

<sup>3</sup> Txãa e'su' êe walaju ki' vxite na'wêk vxyaa: eçx behsa iiméh seena'sa siete dxikthé ji'phsa, diez kaaçxuk ji'phu', sa' dxikthé iisa teeçx koronak ji'phu'.

<sup>4</sup> Txajx mezu yu' estrelxatx puupxãhn äatuwku suwçxa naa kiwekhê pũsx. Sa' txãa eçx seena'sa yu' u'y nasa kasejxa' ũsu'k txãa yaçtek ũythasna yuju, nasa kasejeçpkaçxha' luuçxa's ũ'ya'.

<sup>5</sup> Txajũ' txãa u'ya' teeçx luuçx pihçku ji'phu, txãak naa kiwete jxuka jxkaahwa'jsa yu' iiméh wala juuna'. Txajũ' txãa luuçxa's kusa'jçxa, Dxus jxkaahna ũsnitek jxũna u'jni yuu.

<sup>6</sup> Aça' txãa u'ya' nasa u'pnimée kiwetek ũphna u'j, txãa jii Dxus pheu'jçxa ji'phune' kxtee ũsya'. Kxtee pa'the', mil doscientos sesenta en ähpkaçx sä'jini ũswa'jsa'.

<sup>7</sup> Txãa e'su' cielute puiiwa'kh u'pu', aça' Dxus angel npiiçthê'jsa Migwela' txajx angeleswe'sx yakh puiitx eçx seena'sa yakh. Aça' eçx seena'sawa txãa yakh ũssawe'sx yakh kasejk puiiya'.

<sup>8</sup> Nawa eçxa' knayme', sa' txãawe'sxa' cielute ũswa'j ji'phmeetx neeyũu.

<sup>9</sup> Txãa pa'ga eçx seena'sa's ekaju wãataanik yuu, txãaíik txãniitey ul jñisa yu', naa kiwetewe'sx jxukaysatx iŕxĩina kaypuba'jsa Eçxthê'kh yaase yu'. Txãa eçxthê'j vxite' txãa

yakh ũssa jxukaysatx naa kiwekhẽ wãataanitx yuu.

10 Txajũ' cieluju sus we'wena na'jĩni'sthuwẽse'j:

—Ewte neeyũuwa'j en pa'kh, kwe'sx Dvus txãaçxaçxáa jxkaahwa'j en vxite' Dvus txhitxhnisa Kristowa txã'wëy jxkaahwa'j en. Txãa pa'gatey kwe'sx yakthẽ'jwe'sxtxi ewmeesata' jĩna pãatxhĩ'khna ũssa's ekaju wãataanik yuu, txãa'ik багаçxtewa pu'vxitumée nes yu' kwe'sxtxi pãatxhĩ'khna.

11 Txã'wëtewa, kwe'sx yakthẽ'jwe'sxa' eçx ewmeesa's knaytxi, na'wë Piisxakuẽ jĩnisa ikhni uuk txajx eeju vxite' txajx kaapiya'jni's pu'vxitumée pta'sxna fxi'zepa'ga. Txãawe'sxa' Kristo's selpiipa'ga uu en pa'thewa txã'sa' nxusmée uuya'çxáatx ũsu'.

12 Txã'wë ewmeesa's knaypa'ga weçxweçxa miijajkxwe, cielute fxi'zesawe'sx jxuka. Nawa seena' yuh wala ũukhũukha' naa kiwete mteewe'sxwa jxukaysa yakha'. Txã'wë ũukhũukh yuukahníi eçxthẽ'ja' i'kwe'sxtxi pkxuuya' kĭjk seena' wala ũusaçxana, sa' kuh enmée ũswa'ja's jiia' txãasa txã'wë ũusaçxana ũsa'.

13 Sa' txãa eçx seena'sa' kiwekhẽ wãataani yuuçxa', txãa u'y luuçx ji'phusa's ikhya' pakwek.

14 Nawa txãa u'ya's uuh wala fxu ku'ta na'wësa's ũsniik yuu, eçx seena'sa' tasxu iyuna u'jçxa nasa u'pnimée kiwete txajx ũswa'the fxuhna u'khan, kxteea' tekh anxu pxãhtepkaçx sã'jĩnik fxi'zewa'jsa yu'.



<sup>15</sup> Txajũ' txãa eçxa' yuwesuk yu' nuysêh, yu'a's seena' wala nuywalaaçxa txãa u'ya's yu' jxũna u'khan.

<sup>16</sup> Nawa txãa eçx yuwesu yu'sêesa's kiwe' jxuka çxazxaçxa txãa u'ya's nwe'wek.

<sup>17-18</sup> Txã'wê yũute', txãa eçx seena'sa' txãa u'ya's jweeîçxáak seena' wala ũusaçxa. Sa' txãa u'y ji'jwe'sx yakh puiya'k u'j Dxus jxkaahnitxi's nwêese'jna Jesukristo kaapiya'jni's jxpubamée nwêese'jsawe'sx yakh.

## 13

### *E'z eçx seena' ũukhũukhsa*

<sup>1</sup> Txãa e'su' mar pukateth yujuçxa ũsu', sa' uythu eçx seena' kazx ũukhũukhsa mar pxãjũ kasejeçte, sa' siete dxikthé ji'phçxa diez kaaçxuk ji'phu', kaaçxu iisa teeçx koronak ji'phu'. Sa' txãa dxikthesu yu' Kristo's seena' kazx açewe'wenak fxi'jni yu'.

<sup>2</sup> Txãa eçx seena' kazx ũukhũukhsa' txiklxi na'wêk jxkajkwe yu', çxida yu' oso na'wêtx yu', sa' yuwe yu' león na'wêk yu'. Aça' eçxthê'ja' txãa eçx seena' kazx ũukhũukhsa's kîh yũuya'wa ajãwa'ja's ũsçxa txajx jxkaahna ũsni'swa dukhku, sa' kîhtewa jxuka pu'çxya'k neeyũ.

<sup>3</sup> Txãa eçx seena' kazx ũukhũukhsa dxikthé teeçxsa yu' uupçxâjk kpã'yuuni yu', nawa txãa kpã' yu' wêetniyã'kh yu', aça' naa kiwete nasa jxukaysa txãa eçx seena' kazx ũukhũukhsaçxá'stxi weçxana utxaaçxa neewe'we.

4 Sa' eçxthě'ja'swa weçxana neewe'wetx, txã'wě eçx seena' kazx ũukhũukhsa's jxkaahwa'jsa vxitçxa ki'ppa'ga. Sa' eçx seena' kazx ũukhũukhsa yu'sa' na'jĩnatx neewe'we':

—¿Kim naa na'wěy seena'sa ũski, sa' kim txãa yakh puiiya' çxhãçxhakx? jĩ'tx.

5-6 Sa' eçx seena' kazx ũukhũukhsa's kwe'we'jnik yuu, Dxusa's wěesxuuna açewe'wekahn. Aça' kxtey yuuçxa, Dxusa's wěesxuuçxa açewe'wena Dxus ũsni'swa açewe'wek, cielute ũssawe'sxtxiwa txã'wěyku açewe'we. Sa' txãak jxkaahwa'jsa yuu kuarenta y dos a'te àhpkaçx.

7 Sa' Dxus luuçxtxi ahçeçxa gweçxa'swa vxit kaahnik yuu knaypkaçx. Txãasak naa kiwete jxukaysawe'sxtxi jxkaahwa'jsa yuu, nasa ma'wěsawa maa çxhabuwe'sxwa fxiyfxiy we'wesawa jxukaysatx.

8 Aça' na'wě Piisxakuē jĩnisa ikhni yuuk txã' libru ji'pha' bagaçxte yuhwa uuwa'jsamée yasetx fxi'jni, aça' naa kiwetewe'sx jxukaysa txãawe'sx yase's naa kiwe's vxitiynaçxáa yuhwa txãa librute fxi'jnimeesa' jxukaysa txãa eçx kazx ũukhũukhsa's neewe'wetx.

9 Txãa ente' na'wě seena' yuutxna txã'sa' mwěese'jwe:

10 Nasatx preesu'jsa' txãawe'sxwa preesu'jni yuutxna. Aça' nasatx kçxilxuh ikhsa' txãawe'sxwa kçxilxuh ikhni yuutxna. Txãa pa'ga Dxus luuçxa' Dxus yakh yuuçxáa çxhãçxha fxi'zewa'ja's ji'phuwa'j peejxta'.

11 Txãa e'su' vxite eçx seena' kazxsa kiwe dxijũ kãjaçte uythu. Txã' piisxáa kaaçxu

na'wēsa e'zku ji'phu', nawa txāa eçx seena' kazx ũukhũukhsa na'wēyku Kristo's açewe'we'.

<sup>12</sup> Sa' eçx kazxsa nyafxtewe'sx na'wēy jxkaa-jxa' ājāwa'ja'sku ji'phu', txāasak naa kiwete nasa jxukaysatx jxkaaja', eçx na'wē dxik-thete kpā' seena'sa ji'phuçxawa wēetku txā'sna neewe'wekahn.

<sup>13</sup> Sa' kījīkīhwa seena'sa'swa kaavxya'ja'jya' ājā'k, cielujū ipx wala seena'sa kaakūji'jna naa kiwete nasa yuna ũste.

<sup>14</sup> Eçx kazxsa nyafxtewe'sx tasxte seena'sa's kaavxya'ja'jya' ājāçxa, naa kiwete nasa jxukaysatx kaypuba'kh Dxus yuwe pta'sxsa na'wē kīhwa kaavxya'ja'jçxa. Sa' seena' dxikthete kpā' ji'phçxawa uumée çxhāçxhak txāa na'wēysa piisakaakh itxīmeesa.

<sup>15</sup> Sa' eçx kazxsa kiwe dxiiijū kāasa' txāa piisanisa itxīmeesa's itxī vxit-ya' ājāwa'ja's ji'phu'k. Aça' txāa itxī vxitnisa's neewe'wesamée yuutxi'sa' kiwe dxiiijū kāasa eçxa' kiikhe'jwa'jsak yu'.

<sup>16</sup> Txajū' eçx kiwe dxiiijū kāasa' na'wēk yūu jxukaysatx: le'çxkwesa, walasa, ji'phsa, ji'phmeesa, patron ji'phsa, patron ji'phmeesa, teeçx yuhwa nvxihtmée jxukaysatx iisawa'khaakh paçu kusete meeçxawa dxi'pte.

<sup>17</sup> Sa' txāa eçx kiwe dxiiijū kāasa yaseju iisawa'jni's meeçxawa txāa yase numero's ji'phmeesa yu', kīh yuhwa weyya' ājāmeetxna, sa' txweyya'wa ājāmeetxna maa yuhwa.

<sup>18</sup> Sa' txāa eçx kazxsa numero' kwe'sx jiyunisa'. Aça' txā'sa' jiyuwa'jsa ũsçxa', ũus miiyajkxwe: txāa numero' seiscientos sesenta y seisa'.

# 14

## *Ciento kuarenta y quatro mil nasa memniisa*

<sup>1</sup> Txãa e'su' uythu Piisxakuẽ j̄nisa Sion thã'j vxiçte yujuçxa ùste. Txãa yakh vxite ùsu'tx, ciento kuarenta y quatro mil nasa, txãawe'sx dxikthesu yu' Piisxakuẽ j̄nisa yase vxite' txajx Tata yase's ji'phsa.

<sup>2</sup> Txajũ' cielujũ susni pthũusek yu'wala kuhsa susni na'wẽ vxite' kpi'sx çxhãçxha we'weni na'wẽ susni, iiméh wala kuhsa txãawe'sx arpa tukani na'wẽk pthũuse'.

<sup>3</sup> Txãa nasa' mem u'sesatx memu', Dxus jxkaahna ùsni vxite' Dxus vxitni ìtxĩsa pahz-sawe'sx vxite' Dxus luuçxtxi jxkaahsawe'sx txãawe'sx tasxte. Txã'sa' kim yuhwa piyaya' ãja'çmeeta', naasáa naa kiwetewe'sx ksxavxyu ewte neeyũusáa ciento kuarenta y quatro mil txãawe'sx yuuçxáatx ãjã'.

<sup>4</sup> Txãawe'sxa' Dxus yuuçxáana selpiina fxi'zesatx yu', sa' txãawe'sxa' nasaa ksxavxyu nwe'wenitx yuu Dxus j̄i vxite' Piisxakuẽ j̄nisa txãa j̄i yuuwa'jsa, nyafxte nwe'wenisa. Txãasatx Piisxakuẽ j̄nisa ikhni yuuk txãa mtee u'thewa txãa yakh ja'da u'jwe'.

<sup>5</sup> Sa' k̄ihçxáa yuhwa ìsxĩisa yu'çmeeta', sa' Dxus jxkaahna ùsnite k̄ih p̄kal yuhwa ji'phmée ùsta'.

## *Dxus angeleswe'sx tekhsa pta'sxya' kasehni*

<sup>6</sup> Txajũ' Dxus angel fxuhna u'jweçteth uy ãe walasu. Sa' ewte neeyũunisa bagaçxte yuhwa pçuwa'jsame's pta'sxwa'ja'sku ji'phu' naa kiwetewe'sx mtee mteewe'sxtxiwa, nasa ma'wẽsa,

fxiyfxiycxáa we'wesa, maa çxhabsuwe'sxtxiwa jxuka.

<sup>7</sup> Sa' na'jĩnak sus we'we':

—Dxusa's mtuuthe'jwe ũukhna. Txã'wẽme' jxukaysatx kastigãywa'j ena' ãjxã'kh. Mneewe'wewe cielu, kiwe, mar, yu', kĩjkĩhnawa jxuka vxit-sa's jĩ'k.

<sup>8</sup> Txajũ' Dxus angel vxite na'jĩnak sus we'we':

—Babilonia çxhab txakwe çxhãçxhasaçxawa, Dxus kastigo's jxpa'gawa'the yã'j ũsa'. Txã'wẽ yuukahní naa kiwete nasa mteewe'sxtxiwa jxukaysa pkal kazxte fxi'zewa'ja'sku kaapiya'j naa pa'ga jĩ'k.

<sup>9</sup> Txajũ' Dxus angel tekhtewe'sxku na'jĩna sus we'we':

—Maawa eçx seena'sa vxite' txãa na'wẽy piisani yuuk txãatx neewe'weçxa, txajx iisawa'jni's kaaki'pu'juna dxi'pte meeçxawa kusete na',

<sup>10</sup> txã'wẽ yũusa' Dxus kastigo seena' nxussa's jxpa'gatxna txã'wẽ yũupa'ga. Sa' seena' yuh kastigãyni yuuna asufxre ipx walate, Dxus angeleswe'sx vxite' Piisxakuẽ jĩnisa ikhni yuuk txãawe'sx dxi'pte.

<sup>11</sup> Kastigãyni ipx wala aja' bagaçxte yuhwa pçumée sxi'tana nes yuuna. Aça' kxteea' en ma'k yuu kus ma'k yuu nawa bagaçxte yuhwa jxkaasewa'ja's ji'phumeetxna, txã'wẽ eçx seena'sa vxite' txãa na'wẽy piisani yuuk txãatx neewe'weçxa txajx yaseju iisawa'jni's kaaki'pu'pha'ga.

<sup>12</sup> Txãa pa'ga Dxus luuçxa' txajx jxkaahni's kxtey nwẽese'jna Jesus yakh yuuçxáa çxhãçxha fxi'zewa'ja's ji'phuwa'j peejxta' jĩ'k.

13 Txajũ' ki' wēse'th we'weni cielujũwe'sx, txã' adxa's na'jĩ'k:

—Naa skhēwniijũ Kristo's jxpa'gaçxa uusaawe'sxa' wala yuh wētwe't fxi'zesa yuutxna jĩni's mfxi'j jĩte', Dxus Espiritu paşçxa': Txã'wē yuja', txãawe'sxa' jxkaaseetxna Dxusna selpiina pxthaa yuuna fxi'zenijũ, sa' cielute uyuutxna txãawe'sx mjĩni's jĩ'k.

### *Skuutxh uwatx pkhakhni*

14 Txajũ' thegçxa uythu tãaph çxihme kajkwete nasa yuusáa na'wēsak teeçx kaççxa u'pu'. Dxik-thete vxyuu bee koronak ji'phu', sa' kusete yu' skuutxh wakani zeksa'sku ji'phu'.

15 Cielute Dxus ũsnijũ vxite angel sus we'wena kasejk tãaphte kaççxa u'psa's na'jĩna:

—Skuutxha's wakaçxa mepkhakh. Txã'wēme' jxuka thē'kh aça' pkhakhwa'j en ājk jĩte',

16 tãaphte kaççxa u'psa' naa kiwete skuutxha's wakaçxa jxuka pkhakhku.

17 Txajũ' cielute Dxus ũsnijũ vxite angelwa kasejk uwa udeni zeksa's atçxa.

18 Naapkaçxha' Dxus altaluh vxite angel kasejk txã' ipxa's kaahwa'jsak yu'. Sa' uwa udenisa's ji'phsa's na'jĩnak sus we'we:

—Uwa's uhdeçxa mepkhakh. Txã'wēme' jxuka thē'jni yā'j ũsta' naa kiwete jĩte',

19 Dxus angela' naa kiwete uwa's jxuka uhdeçxa pkhakhku, sa' teeçx ahteçxaçxáak jxuka āsx kxtee ku'sya'. Txãa yu' Dxus kastigo' na'wē seena' yuwa'jsa' jĩnisak yu'.

<sup>20</sup> Txãa uwatxi's çxhab ekajk ku'sni yuu, açã' eeçxaçxáak uwu jiba fxrenusu kãhpkaçx, tres cientos kilómetro peeku'jsu pkaçxku txã'wẽ uta.

## 15

### *Dxus angeleswe'sx siete kastigotx ji'phsa*

<sup>1</sup> Vxite seena' ũukhũukhsa cielute uythu: siete angeleswe'sxa' siete kastigo's pta'sxsatx yu'. Txãa siete kastigosa' nmehsatx yu' Dxus kastigo.

<sup>2</sup> Mar ipx ka'dni na'wẽsa zhiçxkwe speeju na'wẽ khikhyna ũste uythu. Açã' eçx seena'sa vxite' txãa eçx na'wẽy piisani yuuk vxite' txajx yase numero txã'wẽsatx nwẽese'jsameewe'sx yu' txãa mar pukate yujuçxatx ũsu', tukani arpatx Dxus ũsku txãatx atçxa.

<sup>3</sup> Sa' Dxusna selpisáa Moises mema's memu'tx, vxite' Piisxakuẽ jĩnisa'swa weçxana memu'tx na'jĩna:

Dxus, kĩhtewa jxuka ãjãsa,

Seena' yuh wala pu'çxgu kĩhtewa jxuka.

Naa kiwete jxuka jxkaahsa iidx mjĩini' jxuka ewçxaçxáata'.

<sup>4</sup> Kwe'sxtxi jxkaahsag açã' çidxa's kim ũukhmée yuukx?

Sa' çkim idxa's tuuthe'jmée yuukx?

Idx yuuçxáa pkal ji'phmée atesag, açã' maa kiwejuwe'sxwa jxuka idxçxaçxá's neewe'wetxna,

Txãa pa'gately idx ew yũunisa' ãatek yuu jĩnatx memu'.

<sup>5</sup> Txã'wẽ yũunijũ' ki' vxite uythu, cielute Dxus ũsnite Dxus leytxi jxaawni vxitx phateeçte.

<sup>6</sup> Aça' txãa Dxus ũsnijũ yu' siete angeleswe'stxxi kaseh, siete kastigo seena'satx jxũçxa. Txãawe'sxa' athni ropa ate kwentetesatx ji'phu'. Sa' jxtudnisa yu' vxyuu behçxaçxáa peçxun kãhsatx ji'phu'.

<sup>7</sup> Txajũ' Dxus vxitni ãtxĩsa pahzsatewe'sx teeçxsa' vxyuu bee kopa ũsku teeçxsa na'wẽçxah txãa siete angeleswe'stxxi. Kxtee yu' kastigo seena'saçxaçxáa utatx ji'ph yu' Dxus bagaçxtewanees yuuwa'jsa kaahni.

<sup>8</sup> Aça' txãa Dxus ũsnite yu' jxuka ahçxaçxáa utak, Dxus kãhtewa jxuka ãjãwa'jsa tasxu yu-usak yu'. Aça' kxtee yu' kim yuhwa u'kaya' ãjãçmeeta', siete kastigo siete angeleswe'sx ji'phu'tx txãa pçumeyna yu'.

## 16

### *Siete kopa Dxus kastigo's ji'phsa*

<sup>1</sup> Txajũ' siete angeleswe'stxxi na'jĩna sus we'weni wẽse'th Dxus ũsnijũ:

—Dxus kaahni kastigo seena'satx siete kopate ji'phi'kwe txãatx me'jwe pkawya' kiwete jĩte',

<sup>2</sup> Dxus angel nyafxtewe'sxa' u'jçxa txãa kopatewe'sxa's kiwete pkawku. Aça' txã'wẽ yũute', nasa jxukaysa eçx seena' kazxsa vxite' txãa eçx na'wẽy piisani yuuk txãatx neewe'wesawe'stxxi's kakwete wã'jy seena' akasa pa'kh.

<sup>3</sup> Dxus angel e'stewe'sxa' txãa kopatewe'sxa's martek aw, aça' txãa mara' nasaa ee na'wẽçxaçxáak yuu jxuka. Txã'wẽ yũute', txãa marte ũssa ãtxĩsa jxuka uutx.



4 Txajũ' Dxus angel tekhtewe'sxa' txãa kopatewe'sxa's yu'walasu vxite' yu'le'çxkuësu kxsũuk aw, açã' yu' ma'wësa'wa jxuka eeçxaçxáatx yuu.

5 Txajũ' Dxus angel yu'a's thegsa' na'jĩna we'weni'sthu wëse'j: Dxus, nyafxíwa idxgu yu' sa' ãçxwa txãaiçxáag, Dxus atesa. Txãasag txã'wë kastigaĩ'.

6 Iidx yuwe's pta'sxpa'ga ahççxa idx yakh fxi'zesawe'sxtxi ee pkawtxi, txãa pa'gag txã'wë yũusatxi's ka'tuwa ee yusu'. Txãawe'sxa' kastigo's jxpa'gawaj ji'ph yuhta' jĩ'k.

7 Naapkaçxha' Dxus altaluh na'jĩna vxite we'weni'swa wëse'th:

—Dxus kíhtewa jxuka ãjãsa idxa' peekxçxáa kastigaĩmëe, isag kastigaĩ' jĩnik pthũuse.

8 Txajũ' Dxus angel pahztewe'sxa' txãa kopatewe'sxa's sektek aw. Txã'wë yũute', seka' nasatx iiméh wala açxa kweethkahnku txã'wë yuu.

9 Açã' jxukaysa iiméh seena' wala çxhavxytxi. Nawa pkala's nvxihtçxa Dxus tasxte yu' sxawed-meeta' txã'sna neewe'weya'. Txã'wë Dxusna yaakipkaçxte, jweeíçxáatx txã'sna açewe'we' txã'wë seena' kastigãyya' ãjãsa's.

10 Txajũ' Dxus angel tahçtewe'sxa' txãa kopatewe'sxa's eçx seena' kazx ũukhũukhsa jxkaahna ũsnitek aw, açã' txãa jxkaahna ũsni kiwe' çxhi'dxteçxáak yuu. Txã'wë seena' yuute', nasa' ũusçxaniite thune's ya'wa'ki'tx kastigo txakwe seena'sa pa'pha'ga.

11 Makwe txã'wë yuutewa, txãawe'sx ewmëe yũuna fxi'zeni yu'sa' weh yuhwa

ivxiitu'çmeeta'. Txã'wẽ wã'jy seena' akasa pa'thewa, jweeíçxáatx cielute Dxusa's açewe'we'.

<sup>12</sup> Txajũ' Dxus angel seistewe'sxa' txãa kopatewe'sxa's Eufxrates yu'walatek aw. Aça' txã'wẽ yũute', txãa yu'wala' uhdxku jxkaahsawe'sx sek kãani ju'gu yuusa uykhẽwya' ãjãkahn.

<sup>13</sup> Txajũ' na'wẽsath vxite uy: Eçxthẽ'j yuwejũ vxite' eçx seena' kazxsa Kristo's açewe'wesa yuwejũ vxite' eçx kazxsa Dxus yuwe pta'sxsa na'wẽ kîhwa kaavxya'ja'jçxa kaypuba'jsa yuwejũ tekh eçtxxi kaseh sap na'wẽsa.

<sup>14-16</sup> Txãa eçx sap na'wẽsa yu' kîjkîhwa seena'satx kaavxya'ja'jya' ãjã'tx, sa' txãawe'sxa' naa kiwete jxkaahsa jxukaysatx pkhakhya' u'jtx, nmeh ente Dxus txakwe çxhãçxhasa yakh puiiya' sũhçxa. Sa' jxkaahsawe'sx jxukaysatx pkhakhtxi hebreo yuwete Armagedón jĩ'tx teeçx ahte kxtee. Kristo we'weçxa': Yajxmée üsiyna, peswée na'wẽçxãa pa'ja'nja, aça' txãa ente thaamena üsya'mée, Dxus yakh txutemée fxi'zesa' wala yuh wêtwêt neeyũutxna jĩ'k.

<sup>17</sup> Txajũ' Dxus angel sietetewe'sxa' txãa kopatewe'sxa's ãesuk pkaw, naapkaçxha' Dxus üsni cielujũ na'jĩnisak sus we'weni pthũuse txajx jxkaahna üsnijũ:

—Na' Dxus kastigo nmehtewe'sxa' jĩ'k.

<sup>18</sup> Txajũ' kpi'sx kwehnena we'weni seena' susku, aça' ehd iiméh seena' çxhãçxha u'kh, naa kiwe yuuiyna bagaçxte yuhwa txã'wẽ yu' ehd çxhãçxha u'jweçmeene'.

<sup>19</sup> Txã'wě ehd u'pha'ga naa kiwete çxhab jxuka pçuutx. Aça' çxhab iiméh seena' walasawa tekhsutx upe. Aça' Dxusa' yajkxku Babilonia çxhab wala's jxukate kastigâyya', seena' ewmée yūupa'ga.

<sup>20</sup> Txajū' mar pxãhsu kiwe u'psa vxite' vxiç wala jxuka vxitutx.

<sup>21</sup> Naapkaçxha' cielujū kwetuba nasaa kajkwekhē ūsxitx seena' walasa pahz açxoba āh duhsa. Aça' txã'wě seena' yūute', nasa yu' jweeíçxáatx Dxusa's açewe'we', txã'wě kastigo seena'sa's kaapha'ga.

## 17

### *U'y kazx pkal yūusa's ivxiituni*

<sup>1</sup> Txajū' siete angeleswe'sx na'wě siete kopa ji'phu'tx txãatewe'sx teeçxsa's uythu, aça' adxa's na'wěk we'we:

—Ayte myuh, na'wě u'y kazx yūuna fxi'zesa mar kajkwete kaççxa u'pa' txã'sna kastigâywa'ja's pta'sxya'wath.

<sup>2</sup> Maa kiwete jxkaahsawe'sxwa txãa u'y yakhçxaçxáatx kazx pkal yūuna fxi'ze', aça' naa kiwete nasa' txãa kazx fxi'zewa'j yuuçxáanatx piyana ūsu'.

<sup>3</sup> Txajū' adxa' Dxus Espiritu aphniith yuu, aça' Dxus angela' adxa's pe'jna u'kh nasa u'pnimée kiwete. Kxteea' teeçx u'y eçx beh seena' kazxsa kajkwete a'jçxa u'pteth uy. Aça' txãa eçx seena' kazxsa kakwete yu' Dxusna açewe'wena fxi'jnisaçxáa utak ji'phu', sa' siete dxikthé diez kaaçxuk ji'phu'.

4 Txãa u'ya' athni ropa iiméh ew behsak ji'phu', vxyuu beh vxite' kwet zhiçxkwesa vxite' perla iiméh pa'gasa txã'wësa atxhku iijxũ yu'. Sa' kusete yu' vxyuu bee kopa ewmée kazxsaçxaçxáa uta ji'phsa'sku ji'phu'.

5 Sa' dxikthete yu' na'wëk fxi'jni yu': Babilonia çxhab kazx jxtuhthesa kazx yũuwa'ja's kaapiya'jsa jñak fxi'jni yu'.

6 Txajũ' jiyuth, txãa u'ya' tũunik yu' Dxus luuçxwe'sx ee vxite' Jesus kaapiya'jni's pta'sxpa'ga ikhni yuutx txãawe'sx ee yakh. Sa' u'y txã'wësa's uyçxa', wala ũukhthu.

7 Txajũ' Dxus angela' na'jĩ'k:

—¿Kĩh yũuçxa ũukhna ũsga? Kaa-jiyu'jya'wath txãa u'y ma'wësatewa vxite' txãa eçx seena' kazxsa tũ'sna u'jweça' siete dxikthé ji'phçxa diez kaaçxu ji'pha' txã'sna.

8 Eçx seena' kazxsa's uygu txã' nyafxii yu' ũsu'k, nawa açxha' meea'. Txã'wëçxawa kafx iiméh seena' dxiisajũ kasejena vxituya'. Aça' naa kiwetewe'sx jxukaysa txãawe'sx yase's bagaçxteçxáa yuhwa uuwa'jmée itxĩ fxi'zewa'j librote fxi'jnimeesa yu' wala yuh ũukhutxna txãa eçx seena' kazxsa ki' vxyaana txã'sna uyçxa.

9 Na'sa' jiyuwa'jsa ũsçxa', mjiyuwe: U'y kaçxçxa u'pa' txãa eçx dxikthé sietesa' siete vxiç walata'.

10 Sa' txãa dxiktheiçxáa siete jxkaahsata'. Txãa jxkaahsawe'sxa' tahçsa yu' vxituyã'jtx, aça' açxha' seistewe'sxa' jxkaahna ũsa', nawa nmehtewe'sx sietesa yu' jxkaajxa' takhmeya'. Nawa txãa nmehtewe'sxa' jwee yu' txaçxmée jxkaajana.

11 Eçx seena' kazksa nyafxíi yu' ũsu'k nawa ãçxha' meea' txã' jxkaahsa sietesak yu'. Nawa ew jiyute yu', txãáíçxáa jxkaahsa oçxotewe'sx yuuwa'jsa'. Txãa e'su isa jxukate vxituna.

12 Sa' diez kaaçxu uygu txãa yu' diez jxkaahsawe'sxta'. Nawa txãawe'sxa' jxkaajxa' takhmeyta'. Nawa jxkaahsa yuuwa'ja's jxpa'gatxna wala txaçxmeeekuẽçxáa, eçx seena' kazksa yakh ja'daçxah.

13 Txãa diez jxkaahsawe'sxa' ma'wẽ yũuwa'ja'swa kxazíi ja'daçxah puutx we'weçxa ũsta'. Txãasa eçx seena' kazksa's kçxhãaçxha'jatxna kxteeçxah jxkaah pu'çxna.

14 Txã'wẽ yũuçxa Piisxakuẽ jñisa yakh pui-itxna. Nawa Piisxakuẽ jñisa yuh pejka knayu-una txãawe'sxtxi', txãa pa'gatey txã' Maatewa Jxthaakwe Çxhãçxhasa', sa' Maa Jxkaahsatewa Jxthaakwe Jxtuhthesa'. Aça' txãa yakh ũssa' Dxus peeygãhçxa nwe'wenisata' txãa yakh tx-utemée fxi'zesa.

15 Txajũ' Dxus angela' vxite na'wẽsa'swa pta'sxku:

—Na'wẽ u'y kazx pkal yũuna fxi'zesa kaççxa u'pni mar uygu txã' naata': maa kiwete çxhabwa jxuka, nasa majũwe'sxwa fxixfxiçxah we'wesa txãata'.

16 Sa' eçx seena' kazksa dxikthesu diez kaaçxu uygu txã' jxkaahsa yuuwa'jsata', sa' u'y kazx pkal yũuna fxi'zesa's ahççxa sũpxçxáa wãatajatxna. Txã'wẽ yũuçxa, kakwete çxiçx yu'sa' ũ'çxa ipxte kabutxna.

17 Txãa u'ya's txã'wẽ yũuçxa ivxiitukahn, Dxus ne' jxthãas. Txãa pa'ga txãa jxkaahsawe'sxa'

eçx seena' kazxsa's kçxhãaçxha'j pu'çxçxa txã'wẽ yũutxna, Dxus we'weni' kxtey yuukahn.

<sup>18</sup> Aça' u'y kaçxçxa u'pte uygu txãa yu' Babilonia çxhab kazx jxtuhthesa', naa kiwete jxkaahsa jxukaysatx txãaçxaçxáa jxkaahna ũssa.

## 18

### *Babilonia vxituni*

<sup>1</sup> Txãa e'su' Dxus angel cielujũ kĩaçteth uy seena' juuna' jxkaahwa'jsa, naa kiwete zhiçxkwe eena' kweethna.

<sup>2</sup> Sa' na'jĩnak sus we'we:

—Babilonia çxhab txakwe çxhãçxhasaçxawa, Dxus kastigo's jxpa'gawa'the yã'j ũsa'. Sa' açxha' eçxthẽ'j jxkaahni espirtu ewmeesa vxite' vxiçxakwe kazxsaçxaçxáa ũswa'j yuuna pa'kh.

<sup>3</sup> Txã'wẽ yũukahníi maa çxhabwa jxukaysa txãa pkal kazxsateçxaçxáatx fxi'zena ũsu'. Aça' naa kiwete jxkaahsa jxukaysawe'sx pkal kazx yũuwa'ja's yuuçxáatx piya. Txã'wẽy txweysawe'sxwa wala ji'phsa yuutx, pkalte fxi'zewa'jçxá's txweyna jĩ'k.

<sup>4</sup> Txajũ' cielujũ na'jĩna we'weni wẽse'th:

—Adx nasa yã'ja' txãa çxhabu mkaasehwe, txãa pkalsawe'sx yakh ũsya'mée, kxah txãa çxhabte kastigo' i'kwe'sxtxi's kpajkxmeena.

<sup>5</sup> Na'jĩ'th na': txãawe'sx pkala' iiméh seena' walani' cielute kãhpkaçx, kxajk Dxusa' txãa çxhaba's kastigãyya' yajkx txã'wẽ kazxsapa'ga.

<sup>6</sup> Txãawa vxitetx ma'wẽga ewmée yũu txã'wẽy ewmée myũuwe ka'tuwa. Sa' txãawa ma'wẽga vxitetx juuna' yũu, txãate e'z us thaakwe juuna' myũuwe.

<sup>7</sup> Pkxuuna makxũusu'jwe, txãawa makwega iiwejçx yajkxna pkalte fxi'zena ũsu' txãatey ãh. Sa' txã' na'wêk yaaki' txajx ũuste: Ayte jxkaahsa na'wê kaçxçxa u'pthu. Nmi' ji'phmeesameeth, sa' pxthaa yuuna fxi'zeme'nja sũhnak iiwejçx yaaki'.

<sup>8</sup> Txãa pa'ga teeçx enteçxáa kastigo pa'jatxna na'wêsa: nxuswa'j, wějě, uu en, sa' ipxte kabni yuuna. Txãa çxhaba's Dxus çxhãçxhasa' jxuka ivxiituna.

<sup>9</sup> Aça' naa kiwete jxkaahsawe'sx txãa çxhabte kazx pkal yũuna fxi'zesa' wala nxus we'wena ũ'netxna, txãa çxhavxyni aja's uyçxa.

<sup>10</sup> Sa' txã'wê kastigãyni's ũukhçxa, jxu'juçxáa thegutxna na'jina:

—Seena' yuh pxthaa yuuk, Babilonia çxhab txakwe seena' çxhãçxhasa. Naa dudte jxuka vxitunik yuu jĩtxna.

<sup>11</sup> Naa kiwete txweyna fxi'zesawe'sxwa txãa çxhaba's yajkxçxa wala pxthaa we'wena ũ'netxna. Txã'wê yũukahníi ãçxyã'ja' peena yu' kim yuhwa weymeetxna makwe tũ'sna pa'thewa:

<sup>12</sup> vxyuu beh, vxyuu çxihme, kwet zhiçxkwe wala pa'gasa, tela zhiçxkwesa iiméh pa'gasa, fxtũu wêt putasá, marfxil zhiçxkwesa, fxtũu ewsa wala pa'gasa, bronce yaasesa, hieçxo yaasesa, marmól yaasesa, kĭjkĭhwa txã'wê zhiçxkwe vxitnisa.

<sup>13</sup> Vxite' ũ'nisate wêt pēethēsa, kabte wêt putasá, wêt putakahn kakwete sxũsxnisa, vxino, aceite, skuutxh ũ'we ewsa. Vxite' tajkx ktũ'se'jnisa, piisxáa, jiba, kaçxetilxa jiba

wezxnisa. Vxite' nasa txweynisa kīh yuhnawa ya'txweymeena.

<sup>14</sup> Sa' txāa çxhaba's na'jītxna:

—jTxakwe wala weçxana fxi'zeni's ji'phméek neeyūu, sa' txakwe zhiçxkwe ji'phuni'swa jxukate ivxiituk! jītxna.

<sup>15</sup> Txāa çxhabte kījkīhwa txweyçxa wala ji'phsa yuusaawe'sxa' jxu'juçxāa thegna neeyūutxna kastigāyni's ūukhçxa. Sa' wala nxus we'wena ū'netxna

<sup>16</sup> na'jīna:

—jTxāa çxhab txakwe walasa seena' yuh yuuk! Nyafxīi yu' u'y na'wēk zhiçxkwe iijxūçxa fxi'ze', ropa iiméh pa'gasa, vxuyu beh ki'pna yu-unisa, kwet zhiçxkwesa iiméh pa'gasaçxaçxāatx txā'wēsaxku iijxū'.

<sup>17</sup> Nawa txāa ji'phunisa naa dudte jxuka pçuuk jītxna. Txā'wēy barko namuwe'sx, vxite' kxtee mjīisawe'sx jxukaysa jxu'juçxāa thegna neeyūutxna.

<sup>18</sup> Sa' txāa çxhab çxhavxyna sxi'tasa aja's uyçxa', na'jīna sus we'wetxna:

—Mtee yuhwa naa çxhab na'wēy walasa yu' meea' jīna,

<sup>19</sup> nxusweete dxikthekhē kiwe ya'fxihbna sus ū'nena na'jītxna:

—Seenā' nxusnxus knayku çxhab txakwe walasa txajx ji'phuni yakh wala ji'phsa vxitku barko ji'phsa yuutxi' jxukaysatx. Nawa naa dudte jxuka vxitunik yuu jītxna.

<sup>20</sup> Nawa cielute ūssawe'sx wala yuh mweeçxawe txāa çxhaba's kastigāyni's uyçxa, Jesus jxkaahnisawe'sx vxite' Dxus



yuwe pta'sxsawe'sx, Dxus yakh fxi'zesawe'sx jxukaysa. Txãa pa'gatey Dxusa' txãa çxhaba's kastigãyyã'kh, i'kwe'sxtxi ewméee yūupa'ga jīnik pthūuse.

<sup>21</sup> Txajū' Dxus angel teeçxa' seena' wala çxhãçxhasa ũ'khni kwet na'wēsa's kiisçxa, markhēk wāatah na'jīna:

—Babilonia çxhab txakwe walasa txã'wē wāataaní yuuna, aça' txã'sa' bagaçxte yuhwa peena yu' uymeetxna.

<sup>22</sup> Aça' txãa çxhab klxiikhunsu tukani músika arpa, kuvxy, trompeta txã'wēsa pthūusemeetxna. Sa' txãa çxhabte kīh mjīisa yuhwamée yuutxna, sa' ũ'khniçxáa yuhwa pthūusemeena.

<sup>23</sup> Kxtee pki'taniçxáa yuhwa kweethmeena, sa' boda fxiesta vxitna susniwa peena yu' pthūusemeena. Txãa çxhaba' txweyna ũssawe'sx wala yuh çxhãçxhasatx ji'phu'k, sa' naa kiwetewe'sxtxi jxuka kaypuba'kh dxijxuuçxa. Nawa açxha' kīh yuhwa ji'phmée yuuna jī'k.

<sup>24</sup> Txã'wē yuukahní Dxus yuwe pta'sxsawe'sx vxite' Dxus yakh fxi'zesawe'sx vxite' naa kiwete mtee mteewa ikhnisawe'sx eea' jxuka txãa çxhabteçxaçxáak ũs yu'.

## 19

### *Dxusa's cielute weçxana ũsni*

<sup>1</sup> Txãa e'su' cielujū nasa wala kuhsa sus we'weni wēse'th na'jīna:

Kwe'sx Dxus çxhãçxhasa txãa yuuçxáa ewte  
nvxiit-sa',

Sa' txãa yuuçxáa jxtuhthesa',

Txãa pa'ga kwe'sx Dxusa's weçxaaga.

<sup>2</sup> Txãasaíik çxhab txã'wẽ kazx yũuwa'ja'sçxáa  
kaapiya'jsa's kastigãy,

Naa kiwete kazx yũuna suwna ùssa's.

Sa' Dxusna selpisaatx ikhpa'ga ka'tuwa Dxusa'  
kastigãyku jĩ'tx.

<sup>3</sup> Txajũ' ki'kin we'wetx na'jĩna:

—Kwe'sx Dxusa's weçxaaga. Txãa çxhab  
çxhavxyni aja' bagaçxte yuhwa pçumée sxi'tana  
nes yuuna jĩ'çpkaçxha',

<sup>4</sup> weintikwarto jxkaahsawe'sx vxite' Dxus vx-  
itni ítĩsa pahzsawe'sxa' Dxus jxkaahna u'psa  
tasxte peejxũkweçxa weçxatx na'jĩna:

—Txã'wẽ yuh ew yuuk. Txãa pa'ga Dxusa's  
weçxaaga jĩ'tx.

<sup>5</sup> Txãa e'su' Dxus jxkaahna u'pnijũ teeçx na'jĩna  
we'wenik pthũuse:

Kwe'sx Dxusa's mtuuthe'jwe, txã'sna  
selpisaawe'sx

Le'çxkwesa ma'k yuu meeçxawa walasa ma'k  
yuu nawa txã'sçxáana nwẽese'jna  
jxukaysa jĩ'k.

### *Cielute boda fxiesta ãani*

<sup>6</sup> Txajũ' nasa wala kuhsa we'weni  
na'wẽsa'sthi wẽse'j txãa yu' kuh yu' susni  
na'wẽk pthũuse', vxite' kpi'sx sus we'weni  
na'wẽ. Sa' na'jĩ'tx:

Dxusa's wala yuh weçxaaga, txãa pa'gatey  
kwe'sx Dxus kîhtewa jxuka ãjãsa txã'  
jxkaajxa' takhyã'kh.

<sup>7</sup> Aça' seena' wala weçxana txã'sa' tuuthe'jega,  
txãa pa'gatey Piisxakuẽ jñisa nyuu yu-  
uwa'jsa' ya'pheu'kh,

Aça' boda fxiesta ena' ãjxã'kh.

<sup>8</sup> Txãa nyuu yuuwa'jsa' ropa iiméh zhiçxkwe  
çxihmesa's kaathe'jnik yuu jĩ'tx.

(Txãa ropa ewsa yu', Dxus dxi'pte jxpubamée ew  
fxi'zeni jñisa'.)

<sup>9</sup> Txajũ' Dxus angela' na'jñak fxi'khaah:

—Piisxakuẽ jñisa boda fxiestate  
pi'kxnisawe'sx yakha' wala yuh weçxa yuja'  
jña kfxi'ja'jçxa', na'jñak we'we:

—Na'wẽ we'wenisa' Dxus kwe'we'jnisasata'  
jĩte',

<sup>10</sup> adxa' Dxus angel tasxte neewe'weya' pee-  
jxũkweth. Nawa txãa yu' na'jĩ'k:

—Adxa's peejxũkwenu. Adxa' Dxusna selpisáa  
idx na'wẽysaíçxáath, iidx yakhthē'jwe'sxwa  
ma'wẽta Jesus kaapiya'jni isasa's jxpubamée  
pta'sxna pekũjũ' txã'wẽysath. Aça' Dxusçxáana  
mneewe'we. Na'wẽ kîhwa yũuna jña  
kaavxya'ja'th txãa yu' Jesus ma'wẽsatewa  
kaajiyu'jsata' jĩ'k.

### *Jiba çxihmete ajçxa kasehsa*

<sup>11</sup> Txãa e'su' cielu phateçxa üsteth uy, aça'  
teeçx jiba çxihmesak vxyaa. Kxte a'jsa yu':  
Isaçaçxá's Kxtey Yuusáa jñak kxsusni yu', txãa  
pa'gatey isasa yu'sa' jxuka kxtey yuuna puiiçxa  
knayku naa pa'ga.

12 Sa' txajx yafx yu' ipx beesa na'wēk eena' kweethe'. Dxiwthete yu' wala kuh korona ji'phu'k, sa' vxite yase fxi'jni ji'phu'k txāa yase's txāa yuuçxáak jiisa yu'.

13 Txajx athni ropa yu' eete akhnisa'sku jxaath yu'. Sa' txāa yu' Dxus ma'wēsatewa txā'sna kaajiyu'jsa' jñisak yu'.

14 Aça' txāa yakh u'jsa yu' cielutewe'sx jxukaysa jiba çxihmesatetx a'jçxa u'jweç yu', ropa ewsa çxihme atesa's athçxa.

15 Sa' txajx yuwesu yu' espada seena' zeksak sēhna ũsu', txāa yakh maa kiwetewe'sxtxiwa knaywa'jsa. Txā'wē yūuçxak maa kiwetewa jxuka juuna' yuuna txāaçxaçxāa juuna' jxkaahwa'jsa yu'. Sa' ewmeesa yuutxi's seena' kastigaïna kxūusu'jna, uwatx ku'ssawa ma'wēga seena' yū' txā'wēy yūuna Dxus kīhtewa jxuka ājāsa txā'wē seena' kastigaïna.

16 Sa' txajx athni ropate vxite' jī'besu na'jīna fxi'jnik ji'phu': Maa Jxkaahsatewa Jxthaakwe Jxtuhthesa', sa' Maatewa Jxthaakwe Çxhāçxhasa' jīna.

17 Txāa e'su' Dxus angel sekte yujuçxa ũsteth uy, txā' na'jīnak sus we'we uuniisa çxiçxtxi's ũ'sa vxiçxakuēt̃x:

—Jxukaysa pkhaakheçxa myuhwe ũ'ya' i'kwe'sx ũ'wa'j Dxus ũsku txā's.

18 Sa' ũ'wene'kwe uusaawe'sx çxiçx, jxkaah-sawe'sx ma'k yuu, npiçthē'jwe'sx ma'k yuu, nasa iiméh jxtuhthesa ma'k yuu, jiba uuniisa ma'k yuu, jibate a'jsa uusaawe'sx ma'tx yuu, patron ji'phsa ma'k yuu meeçxa' patron ji'phmeesa ma'k yuu, le'çxkwesa ma'k yuu walasa ma'k

yuu nawa txãatx jxuka pkhakhçxa mẽ'we jĩnak we'we.

<sup>19</sup> Txajũ' uythu eçx seena' kazxsa vxite' naa kiwete jxkaahsawe'sx txajx nasa yã'jçxa jxukaysa pkhaakheçxa txãa jibate a'jsa yakh vxite' txajx nasa yã'jçxa pdxi'puçxa puiiya' ũste.

<sup>20</sup> Nawa eçx seena' kazxsa Kristo's açewe'wesa vxite' eçx kazxsa Dxus yuwe pta'sxsa na'wẽ kĩhwa kaavxya'ja'jçxa kaypuba'jsa txãa yakh e'zĩ tudnitx yuu, txã'wẽ Kristo's açewe'wesa ii-sawa'jni's kaaki'pu'jna eçx seena'sa piisani yuuk txã'snawa neewe'wekahn kaypuba'pha'ga. Txajũ' txãa e'zĩitx ipx wala asufxre yakh behna ũsa' txkhẽe wãatãanitx yuu itxĩtey.

<sup>21</sup> Txajũ' jibate a'jsa yuwesu espada seena' zeksa sēhna ũsu'k txãa espadaju ikhnitx yuu nasa ewmeesa yuutxi's, aça' uuniisa çxiçxtxi's vxiçxakwe' txikpkaçxtxi ũ'.

## 20

### *Naa kiwete mil anxupkaçx Kristo jxkaahwa'j*

<sup>1</sup> Txãa e'su' Dxus angel cielujũ kĩaçte uythu, kafx iiméh seena' dxiisatewe'sx lxavxi's atçxa, vxite' çam kadena walasa'sku ji'ph yu'.

<sup>2</sup> Sa' txãa angela' eçxthē'ja's tudku mil anxu āhpkaçx. Txã' txãniitey ul weeswée Satanasku yaase yu'.

<sup>3</sup> Txã'wẽ yũuçxa kafx seena' dxiisate kx-uuphçxa vxitxte yu' selxok ki'p, maa kiwetewe'sxtxiwa peena yu' ĩsxĩya' kasejkahmén mil ānu āhpkaçx. Txãa mil anxu āhte', txh-weteni yuuna txaçxmeeçxáawa.

4 Txajũ' jxkaahna ũsnisatxthu uy, aça' kxsũ yu' kastigãyya' ãjãwa'jsatx kaçxçxa u'pu'. Vxite' Jesus kaapiya'jni's nwēese'jçxa Dxus yuwe's pta'sxna fxi'zepa'ga dxikthe's spē'thçxa ikhni yuutx txãawe'sxtxiwa uythu. Txãawe'sxa' eçx seena' kazxsa vxite' txãa eçx na'wēysa piisani yuuk txã'sna neewe'wesameetx yu', sa' txãa eçx iisawa'jni's dxikthesu meeçxawa kusesuçxáa yuhwa kaaki'pu'jsameetx yu'. Txãawe'sxa' ki' ãtxĩ yuuçxa mil anxutx jxkaahna ũsu' Kristo yakh ja'daçxah.

5 Txãawe'sxa' uuçxawa ki' ãtxĩ yuusaata' nyafxte, nawa vxite uusaawe'sx yu' ãtxĩ yu-umeeta' txãa mil anxu skhēwpkaçx.

6 Dxus yakh yuuçxáa fxi'zeçxa uuniijũwa txãawe'sx khuẽ'y nyafxte ãtxĩ yuusáa yakha' seena' yuh weçxa yuja'. Txãawe'sxa' bagaçxte yuhwa Dxus yakh puutx uywa'jmeete yu' u'jmeetxna. Txãa pa'ga txãawe'sxa' mil anxupkaçx jxkaahna ũsutxna, Dxus vxite' Kristo txãawe'sx tasxte selpiina.

7 Mil anxu skhēwnijũ' eçxthē'ja' tudnijũ txh-weteni yuuna,

8 sa' ãsxĩina kaypuba'jya' kasejena naa kiwetewe'sxtxi jxuka, Gog vxite' Magog txãawe'sxtxi. Txã'wē yũuçxa puiiya' pkhakhena Magogwe'sx nasatx. Txãawe'sxa' iiméh seena' kuhta' kwetmuse na'wē.

9 Txãasatx kiwe makwetewa jxuka ãhçxáa kxaaduu Dxus luuçxtxi vxite' Dxus peeygãani çxhabnawa. Naapkaçxha' Dxusa' cielujũ ipx kaahçxa txãawe'sxtxi' jxuka kabku.

10 Sa' eçxthē'j ãsxĩisa's ipx wala asufxre yakh

behna ũsu'k kxteek akhni yuu, na'wẽ eçx kazxsa Kristo's açesa vxite' Dxus yuwe pta'sxsa na'wẽy yuuçxa kaypuba'kh txãawe'sxtxi akhni yuutx kxtee. Kxteea' en ma'k yuu kus ma'k yuu nawa bagaçxteçxáa yuhwa kaasewa'jmée çxhavxyna nes yuutxna.

*Kastigãywa'ja's pta'sxya' kuutxa'jni*

<sup>11</sup> Txajũ' jxkaahna u'pni çxihmesa seena' walasa'sthu uy, vxite' kxtee kaçxçxa u'psa's. Txajx yafxju thegniteçxáa kiwe vxite' cielu wantaĩmeeçxa jxuka vxitutx, sa' peena yu' vxyaameeta'.

<sup>12</sup> Txajũ' uusaawe'sxtxi uythu, walasa ma'k yuu le'çxkwesa ma'k yuu nawa jxuka Dxus tasxte yujuçxa ũste. Aça' librutx phadenitx yuu, vxite' bagaçxte yuhwa uuwa'jmée ãtxĩ fxi'zewa'j libru yã'jçxa. Txajũ' uusaawe'sxtxi Dxus tasxte kuutxa'jnitx yuu, txãawe'sx ma'wẽ yũuna fxi'zesatewa librute ma'wẽne' fxi'jni ũsu' kxtee thegçxa kastigãywa'ja's pta'sxya'.

<sup>13</sup> Yu'khẽ khẽeçxa uusaawa ãtxĩ yuuçxa ki-itetx, naapkaçxha' kiwe dxiiga pedanisawa ãtxĩ yuuçxa kiitetx. Aça' jxukaysatx teeçxsa na'wẽçxah ma'wẽ yũuna fxi'zesatewa pta'sxçxa kastigãywa'jtx yuu.

<sup>14</sup> Txajũ' uu en vxite' uusaawe'sx yã'jçxa in-fxierno ipx walate akhnitx yuu. Txãa in-fxierno ipx walate khẽenijũ' bagaçxte yuhwa Dxus yakh peena yu' puutx uywa'jme'.

<sup>15</sup> Aça' kxteetx akhni yuu bagaçxte yuhwa uuwa'jmée ãtxĩ fxi'zewa'j librute txãawe'sx yasetx fxi'jnimeesatxi's.

# 21

## *Cielu u'sesa kiwewa u'sesa uyni*

<sup>1</sup> Txãa e'su' cielu u'sesa vxite' kiwewa u'sesath uy. Txã'wẽ yuukahníi nyafxiitey cielu vxite' kiwewa nyafxiiteywe'sxa' skhẽwniitx yuu, açã' kîh mar yuhwa meek yuu.

<sup>2</sup> Juan yaasesa adxa' uythu Dxus çxhab Jerusalen u'sesa txã'wẽ Dxus tasxu cielujũ kîjaçte. Txãa çxhaba' seena' ew pheu'jni yu'k, novxia iimi'ya' pheu'jçxa ãythãna ãs na'wẽ.

<sup>3</sup> Sa' cielujũ sus na'jîna we'weni wẽse'th:

—Mtheg, ãçxha' Dxusa' nasaa ksxavxyte ãsa' txãawe'sx yakh fxi'zeya', açã' nasa' Dxus jîi yu-utxna. Dxusa' txãawe'sx Dxus yuuya' txãawe'sx yakh fxi'zena.

<sup>4</sup> Txãasa Dxusa' kîh nxusniijũwa jxuka nwe'wena, açã' peena yu' uuwa'jmée yuuna. Õ'newa'j enwa pa'jmeena, nxus we'wewa'jwa pa'jmeena, akasawa pa'jmeena, txãa pa'gatey nyafxíi fxi'zeni ena' skhẽwku jî'k.

<sup>5</sup> Txajũ' jxkaahnite kaçxçxa u'psa' na'jî'k:

—Mtheg, kîhtxwa jxuka yu'pthehçxa u'seçxaçxáath vxit jxuka jîçxa', ki' na'wẽk we'we:

—Na'wẽ we'wenisatxi' mfxi'j, txãa pa'gatey txã' isa kxtey yuuwa'jsata' jîçxa',

<sup>6</sup> ki' we'wek:

—Adx we'weni' jxuka kxtey yuunik yuu. Adxa' naa kiwe meetey ãsyã'th yu', sa' bagaçxtewa nes yuuwa'jsath pçuwa'jsamée. Açã' maawa yũ'wẽesa's kîh yuhwa vxyuu pa'gamée ãsu'nja yu' bagaçxte yuhwa uumée kaafxí'ze'jwa'jsana.



7 Maawa ewmeesa yu'sa' nwēese'jmée jxuka knaysawe'sxa' kīhwa Dxus jīi yu'sa' jxuka txāawe'sxçxaçxáa jxpa'gatxna. Aça' adxa' txāawe'sx Dxus yu'nja, naapkaçxha' txāawe'sxa' adx luuçx yuutxna.

8 Nawa maa nasawa Dxusa's çxhâçxha yaakxsamée yā'ja' ya'skaçxa fxi'zesa, kīhtewa kazxçxáa yūuna fxi'zesa, nasa ikhsa, kazx pkal yūuna fxi'zesa, dxijxuuna fxi'zesa, Dxus itxīmeesatx neewe'wesa, īsxīisa txāawe'sxa' infxierno ipx wala asufxre yakh behna ūsa' kxtee khēeya' u'jwa'j ji'phutxna, bagaçxte yuhwa Dxus yakh peena yu' puutx uyya'mée.

### *Jerusalen u'sesa's uyni*

9 Txajū' Dxus angel sietesawe'sx na'wē Dxus kastigo nmeh sietesatx ji'phu'tx siete kopate txāa sietesawe'sx teeçxsa' kūhçxa na'wēk we'we:

—Myuh thegya', pta'sxya'wath Piisxakuē jīnisa nyuu yuuwa'jsa's jī'k.

10 Naapkaçxha' Dxus Espiritu aphniith yuu, aça' Dxus angela' pe'jna u'kh, teeçx thā'j vxix seena' wala ēete. Sa' kxtee kâhçxa', kaavxya'ja'kh Jerusalen çxhab wala Dxus tasxu cielujū kīisa's.

11 Txāa çxhaba' zhiçxkwe zmeena'k kweethna ūsu', Dxus kweethniju. Sa' txāa zmeena' kweethnisa yu' kwet iiméh zhiçxkwe kwentetesa na'wēk yu'.

12 Sa' txāa çxhab peeku'j yu' kwetçxaçxáak uphni yu', wala ēete jxu'j umnisa, sa' doce vxitxku ji'phu'. Sa' txāa vxitx iisa teeçx angeltxi

ũsu'. Txãa vxitxsu yu' Israel ji'j docesawe'sx yasetx fxi'jnity u'pu'.

<sup>13</sup> Sek kãani ju'gu tekh vxitxtxi u'pu'. Sek khēeni ju'guwa tekh vxitxtxi u'pu'. Sa' thakwe ju'guwa tekh vxitxtxi u'pu', vxite' tasxu ju'guwa kxaz vxitxi.

<sup>14</sup> Txãa çxhab peeku'j doce kwet ki'pçxa txãa kajkwesuk kwet uphni yu' txãa iisa doce yasetx fxi'jni yu', na'wē Piisxakuē jñisa jxkaahnisa docesawe'sx yasetx.

<sup>15</sup> Adx yakh we'wesa Dxus angela' ji'phu'k isani metro vxyuu behçxaçxáasa txãa çxhaba's isawa'j, vxite' kxtee vxitx vxite' txãa kwet uph txã'wēsatsx isawa'j.

<sup>16</sup> Çxhaba' puutx txakhweçxaçxáak yu' jxu'jya'wa txakhuēy, tapeya'wa txakhuēy. Aça' Dxus angela' txãa çxhaba's isani metro yakh isate', dos mil doscientos kilómetro ji'phu'k jxu'jya' txakhuēy, tapeya'wa txakhuēy, khēete ēetewa txakhuēy, puutx txakhweçxaçxáatx yu'.

<sup>17</sup> Txajũ' kwet upha'sku isa, aça' sesenta y kuarto metrok ji'phu' khēete ēete. Kwe'sx isani metro jiitha'w txãa yakhíçxáak Dxus angela' isana ũsu'.

<sup>18</sup> Txãa upha' kwet jaspe yaasesa yakhçxaçxáak umni yu', aça' çxhab yu' vxyuu behçxaçxáak yu', txãasak seena' zhiçxkwe zmeena' vxya'.

<sup>19</sup> Kwet upha's kaaçxida'jnisa kwet yuutxi'sa' kwet fxiyfxiy zhiçxkwesa yakhçxaçxáatx pheu'jni yu' txã' naata': nyafxtewe'sxa's, jaspe yaasesa yakh; e'stewe'sxa's, safxiro yaasesa

yakh; tekhtewe'sxa's ágata yaasesa yakh;  
pahztewe'sxa's, esmeralda yaasesa yakh;

<sup>20</sup> tahçtewe'sxa's, ónice yaasesa yakh;  
seistewe'sxa's, kornalina yaasesa yakh;  
sietetewe'sxa's, krisolita yaasesa yakh;  
oçxotewe'sxa's, berilo yaasesa yakh;  
nwewetewe'sxa's, topacio yaasesa yakh;  
dieztewe'sxa's, krisoprasa yaasesa yakh;  
oncetewe'sxa's, jacinto yaasesa yakh;  
docetewe'sxa's amatista yaasesa txã'wësa  
yakhtxi skadni yu'.

<sup>21</sup> Doce vxitxsa yu', perlaçxaçxáatx yu', teeçx  
perlaçxáa teeçx vxitxte ãjk yu'. Aça' çxhabte  
klxiikhun wala yu' vxyuu behçxaçxáak yu',  
txãasak zhiçxkwe zmeena' vxyaana nes yu'.

<sup>22</sup> Kxteea' pkhaakheni dxuus yat uymeeth, txãa  
pa'gatey kwe'sx Dxus kïhtewa jxuka ãjãsa txãa  
çxhabte jxuka ãhçxáak ũsu', Piisxakuë jïnisawa  
txã'wëy.

<sup>23</sup> Txãa çxhaba' sek, a'te, txã'wësa eena'  
kweethwa'jsa peejxmeeek yu', txãa pa'gatey  
Dxus zmeena' khikhyni yakhçxáa jxukak eena'  
kweethe', aça' vxite zmeena' kweethsa' Piisxakuë  
jïnisaiiçxáak yu'.

<sup>24</sup> Maa kiwetewe'sxwa Dxus nwe'wenisa' txãa  
çxhab eena' kweethnisu fxi'zetxna, aça' maa  
jxkaahsawe'sxwa txãa çxhaba's weçxana wala  
tuuthe'jetxna.

<sup>25</sup> Txãa çxhabte vxitxa' maa enteçxáa yuhwa  
aphni yuumeena, txãa pa'gatey çxhi'dxwa'j  
enwa méé yuuna.

<sup>26</sup> Kxteea' wala yuh txãa çxhaba's weçxana  
tuuthe'jetxna maa kiwejũwe'sxwa.

27 Nawa kazxsa yu' kīh yuhwa u'kameena, ahçena ĩsxĩisa kījkhwa ewmée yūusa. Naasáa Piisxakuē jīnisa libru jī'pha' txāa librute txāawe'sx yasetx fxi'jnisa yuuçxáa u'katxna багаçxte yuhwa uuwa'jmée ĩtxĩ fxi'zewa'jsa.

## 22

1 Txajũ' Dxus angela' teeçx yu'wala seena' zhiçxkwe çihme atesa's pta'sxku, багаçxte yuhwa uumée kaafxi'ze'jwa'jsa's. Sa' txāa yu'a' Dxus jxkaahna ũsni vxite' Piisxakuē jīnisa txāawe'sx jxkaahna ũsnijūk kasehna ũsu'.

2 Çxhabte kxiikhun walasa pxāhte vxite' yu'wala pukate puutx pdxi'p fxtūutasx buçxaçxa walaana kāhtx, багаçxte yuhwa uumée kaafxi'ze'jwa'jsa. Sa' txāa fxtūutasxa' a'te iisak yūnna nes yu', txāasak anxute' doce weces yūnu', naapkaçxha' eç yu' yu'çek selpi' maa kiwejū nasatxwa jxuka.

3 Kxteea' ewmeesa yu' kīh yuhwamée yuuna. Txāa çxhabte' Dxus vxite' Piisxakuē jīnisa txāawe'sx jxkaahna ũsutxna, naapkaçxha' txāawe'sxtxi selpisaawe'sxa' weçxana neewe'wena nes yuutxna.

4 Kxteea' Dxus yakh pdxi'puçxa puutx uyya' ājāttxna, sa' Dxus yase's txāawe'sx dxikthesu jī'phsa yuutxna.

5 Kxteea' çxhi'dxwa'j enmée yuuna, aça' kxtee fxi'zesa' pki'tawa'jwa peejimeetxna, sa' sek kweethniwa peejimeena, txāa pa'gatey eena' kweethsa' Dxusĩiçxá'. Aça' kxtee ũssa' багаçxtewa weçxana nes yuutxna.

*Jesukristo kiiwa'j en utxa üsa'*

<sup>6</sup> Txajü' Dxus angela' adxa's na'jĩnak we'we:

—Na'wē pta'sxnisa' isa kxtey yuuwa'jsata', aça' txāatxi's isasa yuhtxna sũhna wa'lmée jxpa'gawa'ja'. Txāa pa'gatey nyafxii txajx yuwe's pta'sxsawe'sxtxi kaaũusuthe'kh txāa Dxus íçxáak āçxwa txajx angela's kaah, na'wē kĩhwa yũuya'wa' jwee yu' jxthēeyuumée txāatx kaajiyu'khan āçxh naa ensu selpisaawe'sxtxi.

<sup>7</sup> Txajü' Jesus we'weçxa':

—Txaçxmey yuwe'nja, aça' naa librute Dxus yuwe's fxi'jni üsta' txāatx kxtey yũusa' seena' weçxana neeyũutxna jĩ'k.

<sup>8</sup> Juan yaasesa adxa' txā'wēsathu uyna wēse'jna yuu. Sa' txā'wē uyna wēse'jçxa', Dxus angel kaavxya'ja'kh txajx tasxte peejxũkweth neewe'weya'.

<sup>9</sup> Nawa txāa yu' na'wēk we'we adxa's:

—Adxa's peejxũkwenu. Adxa' idx na'wēysaiçxáath, iidx yakhtē'jwe'sxwa ma'wēta Dxus yuwe's pta'sxna fxi'ze' txā'wēsath, vxite' Dxus librute fxi'jni üsa' txā'sna kxtey yuusawe'sx na'wēysaiçxáath Dxusna selpisáa. Aça' wejxwa Dxusnaçxáa mneewe'we jĩ'k.

<sup>10</sup> Txajü' ki' we'wek na'jĩna:

—Naa librute Dxus yuwe's fxi'jni üsa' txā'sa' pta'sxmée yu' yuunu. Txā'wēme' kxtee we'wenisa kxtey yuuwa'j en ājxa'wa'.

<sup>11</sup> Aça' txāa en āanijuyā'ja', pta'sxni's nwēese'jsamée yu' jweeíçxáa ewmée kazx yuuna fxi'zetxna, naapkaçxha' pta'sxni's nwēese'jsa' jweeíçxáa Dxus yakh txutemée çxhāçxha fxi'zetxna.

12 Txajũ' Jesus ki' we'weçxa':

—Txaçxmey yuuyuju'nja. Sa' teeçxa na'wêçxah kîh yũuna fxi'zesatewa txã'wê fxi'zepa'ga deweni's jxũçxa yuwe'nja.

13 Adxa' naa kiwe meetey ũsyã'th yu', sa' bagaçxtewa nes yuuwa'jsath. Adxthu nyafxte ũsya' takh, sa' jxuka skhêwtewa adx íçxáa neeyũuwa'jsath pçuwa'jsamée.

14 Maawa athni ropa's yaateçxa ji'phsa yakha' wala yuh weçxa yuja', Dxus çxhabte vxitxte u'kaçxa kxtee fxtũutasx bagaçxte yuhwa uumée kaafxi'ze'jwa'jsa's ũ'ya' u'kasa yakha'.

15 Nawa kazx ewmeesawe'sx, dxijxuuna fxi'zesa, kazx pkal yũuna fxi'zesa, nasa ikhsa, Dxus ítxímeesatx neewe'wesa, kîhtewa jxuka ísxíiwa'jçxá's yajkxna fxi'zesa txã'wê yũusawe'sxa' u'kaya' ãjãmeeçxa ekaju neeyũutxna.

16 Jesus ki' we'weçxa': Adxa' adx tasxte selpisáa angela's kaath, Dxus luuçxwe'sxtxi txã'wêsa's jxuka pta'sxkahn. Adxa' nyafx-tewe'sxthu, sa' jxkaahsa Davxid ji'the kasehsath. Sa' khikhiiçte estrelxa zhiçxkwe eena' kweeth-sath jĩ'k.

17 Aça' Dxus Espiritu vxite' Piisxakuẽ jînisa nyuu txãawe'sxa' pi'ki'tx:

—Myuh jîna.

Aça' txã'wê pi'kxni's wêse'jsa' jweeju mpa'yawe. Aça' yũ'wêesa' utxaaçxa mpa'gawe yu' bagaçxteçxáa yuhwa uuwa'jmeete kaafxi'ze'jsa's, kîh yuhwa vxyuu pa'gamée.

18 Dxus yuwe naa librute fxi'jni ũsa' txã'sna nwêese'jsa jxukaysatx adxa' na'wêth yu'kxpeje':

Dxus yuwe naa librute fxi'jni ũsa' txãate kîhçxáawa yutxawáatxna açá' txã'wẽ yũusatxi's na'wẽ naa librute kastigo fxi'jni ũsta' txãatx jxpa'gawa'j vxituna Dxusa'.

<sup>19</sup> Meeçxawa Dxus yuwe naa librute fxi'jni ũsa' txã'sna kîhçxáawa ivxiituwáatxna açá' txã'wẽ yũusatxi's Dxusa' puuçmeena txãa fxtũutasx багаçxte yuhwa uumée kaafxi'ze'jwa'jsa's. Sa' na'wẽ pta'sxna fxi'jni yuuk txãa çxhabetwa ka'ga'jmeena.

<sup>20</sup> Txã'wẽ yũuwa'jsa' na'jĩ'k:

—Txaçxmey yuuyuju'nja jĩte', passa':

—Txã'jĩwaççxáawa, wêt yuuna. Nawa dud myuh, Jesus.

<sup>21</sup> Kwe'sxtxi jxpe'jsa Jesukristo' i'kwe'sx jxukaysatx pu'çxhina.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

06da09f4-8d0f-5001-ae8c-0e6aa0131ffd